



9 8 0 1 2 3 4 5 6 7 8 9 9 0 1 2 3 4 5 6 7 8 9 10 0 1 2 3 4 5 6 7 8



80

1

2

3

4

5

6

7

8

9

10

11

12

13

14

15

16

17

18

19

20

21

22

C40-4514

丁翁一座諸大歲及有  
家書一帖武州紫雲山  
我微笑喜院庭府中永  
為學者不敢許出院內  
當山二世鐵牛機謹啟



B 64853



賢愚因緣經卷第六

元魏沙門慧覺譯

快目王眼施緣品第二十七

如是我聞一時佛在舍衛國祇樹給孤獨園爾時世尊大衆圍遶而爲說法城中人民樂聽法者往至佛所前後相次時城中有盲婆羅門坐街道邊聞多人衆行步駛疾卽問行人此多人衆欲何所至行人答曰汝不知耶如來出世此難值遇今在此國敷演道化我等欲往聽其說法此婆羅門而有一術衆生之中有八種聲悉能別識知其相祿何謂八種一曰烏

聲二曰三尺烏聲三曰破聲四曰鴈聲五曰鼓聲六曰雷聲七曰金鈴聲八曰梵聲其烏聲者其人受性不識恩養志不廉潔三尺烏聲者受性充暴樂爲傷害少於慈順其破聲者男作女聲女作男聲其人薄德貧窮下賤其鴈聲者志性勦了多於親友將接四遠其鼓聲者言辯辯捷解釋道理必爲國師其雷聲者智慧深遠散析法性任化天下金鈴聲者巨富饒財其人必積千億兩金其梵聲者福德彌高若在家者作轉輪聖王出家學道必得成佛時婆羅門語行路人我能識別人之語言若實是佛當有梵音沙門口

將我往至其所當試聽之審是佛不時行路人因牽將往漸近佛所聞佛說法梵音具足深遠流暢歡喜踊躍兩目得開便得見佛紫磨金色三十二相明朗如日卽時禮佛喜慶無量佛爲說法志心聽受卽破二十億惡得須陀洹已得慧眼便求出家佛言善來便成沙門佛重方便廣爲說法卽復尋得阿羅漢果一切衆會莫不奇怪賢者阿難從座而起長跪叉手而白佛言世尊出世實多饒益拔濟盲冥恩難稱極此婆羅門一時之中肉眼旣開慧眼清淨佛於此人恩何隆厚佛告阿難吾與其眼不但今日過去世時

亦復與眼阿難重白不審世尊過去與眼其事云何  
唯願垂哀具爲解說佛告阿難過去久遠無量無數  
不可思議阿僧祇劫此閻浮提有一大城名富迦羅  
拔時有國王名須提羅此言快目所以名之爲快目者其  
目明淨清妙無比徹覩牆壁視四十里以是故立字  
號曰快目領閻浮提八萬四千國六萬山川八十億  
聚落王有二萬夫人殊女一萬大臣五百太子其第  
一太子名尸羅拔陀提戒賢此言王有慈悲愍念一切養  
育民物猶如慈父化導以善民從其度風時雨順四  
氣和適其國豐樂羣生蒙賴爾時其王退自思惟我

因宿福今爲人主財寶五欲富有四海發言化下如  
風靡草今世會用更無紹續恐我來世窮苦是分譬  
如耕夫春日多種秋夏收入所得必廣復遭春時若  
當懶惰來秋於穀何望是以我今於諸福田及時廣  
種不宜懈怠卽告羣臣出我庫藏金銀珍寶衣被飲  
食所須之具著諸城門及積市中徧行宣令一切人  
民有所乏者皆悉來取并復告下八萬四千國亦令  
開藏施給一切時諸羣臣奉受王教卽豎金幢擊大  
金鼓瞻王慈教徧閻浮提閻浮提人沙門婆羅門孤

王慈澤安快自娛無復憂慮歌頌讚歎皆稱王德爾時過裔有一小國其王名曰波羅陀跋彌特遠傲慢不賓王化又其治政五事無度受性倉卒少於思慮耽荒色欲不理國政國有忠賢不往諮稟邊境之土役使煩倍商賈到國稅奪過常彼王有臣名勞陀達聰明智略明識道理觀其遠度前諫王曰王有五事不能安國必招禍患恐是不久儻不忘諱聽臣說之王曰便道尋長跪白王受性倉卒少於思慮事大不當必致後悔王耽荒色欲不理國事外有枉滯理情無處國有忠賢不往諮稟則不防慮未然之事過土

之民役調煩劇則思違背賓屬他國商買稅奪違於常度惡憚行來寶貨猛貴有此五事亡國之兆願王易操與民更始須提羅王恩慈廣普闇浮提人咸蒙慧澤我曹此國獨不恭順幽遐之民不蒙其潤願王降意還相承奉便可子孫食祿長久波羅陀跋彌聞此臣語心恚作色不從其言臣勞陀達益生瞋憤而自心念我見王治政匡化不周表貢忠誠望相扶輔反更怒盛不從我言既不用儻復見殺當就除之爲民去患謀未及就事已發露王合兵衆欲往誅討時勞陀達知王欲收卽便乘疾馬逃走而去兵衆尋

逐彼勞陀達素善射術又知人身著射應死處凡有十八兵衆雖遠不敢能近逕得微到富迦羅拔國見快目王拜問訊訖共王談對事事得理王卽善之立羣臣言彼之國土不屬我耶羣臣答曰悉屬大王但恃遐遠不來賓附勞陀達言彼波羅陀跋彌頑嚚克闇縱逸荒迷不識禮度憑遠守謬不承王命彼民惡厭視之如怨與臣兵馬自往降伏王聞其語卽然可之告下諸國選擇兵衆剋日都集往彼波羅陀跋彌王國爾時波羅陀跋彌比國之王遣人語之間浮提

內都勅發兵當集汝國汝快晏然而安坐耶波羅陀跋彌聞是消息愁悶迷憤莫知所如著垢黑衣坐黑暗處有輔相婆羅門來至其所問其意故王有何憂願見示語波羅陀跋彌王曰卿不聞乎前勞陀達逃突至彼快目王邊因相發起令快目王悉發八萬四千諸國兵衆欲來攻我若當來者便滅我國其輔相曰當令羣臣試共議之卽合共議各各異計共輔相言我聞快目王自誓布施唯除父母不以施耳其餘一切不逆來意今此國中有盲婆羅門當勸勉之往乞王眼若能得者軍兵足卻王聞是語卽然可之尋

80 1 2 3 4 5 6 7 8 9

1 2 3 4 5 6 7 8 9

100

遣輔相往求曉之輔相卽時遣人往喚尋使來而告之曰今有國事欲相勞苦願垂留意共相佐辦婆羅門言我今盲冥竟何所能而相佐辦輔相又曰須提羅王欲合兵衆來伐我國若當來者我等強壯雖能逃避猶憂殘戮況汝無目能得脫耶彼王有誓一切布施隨人所須不逆人意往從乞眼庶必得之若得其眼兵衆可息此事苟辦當重慕汝婆羅門言今我無見此事云何王重勸勉我當遣人將護汝往卽給道糧行道所須引路而去時快目王國種種災怪悉皆興現空中崩聲曳電星落陰霧霹靂地處處裂飛

鳥之類悲鳴感切挫戾其身自拔羽翼虎狼師子走獸之屬鳴吼人間宛轉于地國王臣民怪其所以時婆羅門漸到大城徑至殿前高聲唱言我在他國承王名德一切布施不逆人意故涉遠來欲望乞匱王聞是語卽下問訊步涉遐道得無疲倦若欲所得一切所須國土珍寶車馬輦輶衣被飲食隨病醫藥一身布施果報乃大我久失眼長夜處冥承聞大王故發意來欲乞王眼王聞歡喜語婆羅門若欲得眼我當相與婆羅門言欲與我者何時能與王語之曰卻

後七日便當與汝王卽宣下八萬四千小國須提羅  
王卻後七日當剗其目施婆羅門諸欲來者悉皆時  
集諸王人民聞斯令已普來奔詣於大王所八萬四  
千諸王臣民以身投地腹拍王前啼淚交流而白王  
言我之等類閻浮提人蒙賴大王以爲蔭覆若當剗  
眼施婆羅門一切人民當何恃怙唯願迴意勿爲一  
人而捨一切一萬大臣亦皆投地仰白王言何不哀  
愍憐我曹等爲一人意捨棄我等唯願迴意莫與其  
眼二萬夫人頭腦打地腹拍王前亦皆求請唯願大  
王迴意易志莫以眼施安慰我等五百太子涕哭王

前唯願天父當見矜憐莫以眼施撫養我等時戒賢  
太子重白王言願剗我眼以代父王所以然者我雖  
身死國無損益大王無眼海內靡恃時快目王告諸  
王臣夫人太子我受身來生死長久設積身骨高於  
悲淚多於四海地獄之中破壞之身燒煮斫刺棄眼  
無數餓鬼之中受若干形火從身出還自焦然如是  
破壞眼亦無數畜生之中更相食噉種種死傷復不可  
計人間受身壽多中夭或爭色欲還相圖謀共相  
傷殺死非一微如是破散無央數眼正使生天命亦

不久計本以來亦受多形於此三界迴波五道爲貪  
恚癡碎身塵數未曾給施用求佛道如此是眼危脆  
之物如是不久自當爛壞今得用施不應不與今持  
此眼以用布施求佛無上一切智眼若我願成當與  
汝等清淨慧眼汝莫遮我無上道意其在會者默然  
無言正語左右可挑我眼左右諸臣咸各言曰寧破  
我身猶如芥子不能舉手向大王眼王語諸臣汝等  
推覓其色正黑蹄下視者便召將來諸臣求得將來  
與王王卽授刀勑語令剗剗得一眼著王掌中王便  
立誓我以此眼以用布施誓求佛道若審當得成佛

道者此婆羅門得我此眼卽當用視作是誓已王卽  
以眼安婆羅門眼匡之中尋得用見得視王身及餘  
衆會歡喜踊躍不能自勝卽白王言得王一眼足我  
用視願留一眼王自用看王復答言我已言決許與  
兩眼不應違言便更剗一眼復著掌中重復立誓我  
持眼施用求佛道審能成佛至誠不虛此婆羅門得  
於我眼便當用視復安一眼尋得用視當爾之時天  
地震動諸天宮殿皆亦動搖時諸天人愕然驚懼尋  
見菩薩剗目布施咸皆飛來側塞虛空散諸華香而  
用供養讚言善哉大王所作甚奇甚特天帝前問實

爲奇特能作是事欲求何報王答言曰不求魔梵四  
王帝釋轉輪聖王三界之樂以此功德誓求佛道度  
脫衆生至涅槃樂天帝復問汝今剜眼苦痛如是頗  
有悔退瞋恚不耶王言不悔亦不瞋恨天帝復言我  
今觀汝血出流離形體戰掉言不悔恨此事難信王  
卽自誓我剜眼施無悔恨意用求佛道會當得成審  
不虛者令我兩眼平復如故王誓已訖兩眼平完明  
淨徹視倍勝於前諸天人民一切大會稱慶喜踊不  
能自勝王語婆羅門今與汝眼令汝得視後成佛時  
復當令汝得慧眼見將婆羅門入寶藏中恣取一擔

發遣去還到本國波羅陀跋彌自出迎之已見先問  
得眼不耶答言得眼我今用視復問言曰彼王今者  
爲存爲亡答言諸天來下尋卽誓願眼還平復眼好  
於前波羅陀跋彌以聞此語惱悶憤結心裂而死佛  
告阿難欲知爾時須提羅王今我身是波羅陀跋彌  
今調達是時乞我眼婆羅門者今此會中盲婆羅門  
得道者是先世之時我與其眼乃至今日由見我故  
旣得肉眼復得慧眼我爲汝曹世世苦行積功累德  
今日致佛汝等應當勤求出要佛說是語時諸在會  
者感念佛恩內身充厲有得須陀洹斯陀含阿那含

阿羅漢者有發無上道意者賢者阿難及諸會者聞佛所說歡喜奉行

五百盲兒往返逐佛緣品第二十八

如是我聞一時佛住舍衛國祇樹給孤獨園爾時毗舍離國有五百盲人乞匂自活時聞人言如來出世甚奇甚特其有衆生覩見之者癃殘百病皆蒙除愈盲視聾聽瘡語僂伸拘躄手足狂亂得正貧施衣食愁憂苦厄悉能解免時諸盲人聞此語已還共議言我曹罪積苦毒特兼若當遇佛必見救濟便問人言世尊今者爲在何國人報之曰在舍衛國聞此語已

共於路側卑言求哀誰有慈悲愍我等者願見將導到舍衛國至於佛所喚倩經時無有應者時五百人復共議曰空手倩人人無應者今共行乞人各令得金錢一枚以用雇人足得達彼各各行乞經于數時人獲一錢凡有五百合錢已竟左右喚人誰將我等到舍衛者金錢五百雇其勞苦時有一人來共相可相可已定以錢與之勑諸盲人展轉相牽自在前導將至摩竭國棄諸盲人置於澤中是時盲人不知所在爲是何國互相捉手經行他田傷破苗穀時有長者值來行田見五百人踐踏苗稼傷壞甚多瞋憤怒

盛勅與痛手乞兒求哀具宣上事長者愍之令一使  
人將詣舍衛適達彼國又聞世尊已復來向摩竭提  
國是時使人復還將來向摩竭國時諸盲人欽仰於  
佛係心欲見肉眼雖閉心眼已覩歡喜發中不覺疲  
勞已至摩竭復聞世尊已還舍衛如是追逐凡經士  
返爾時如來觀諸盲人善根已熟敬信純固於舍衛  
國便住待之使將盲人漸到佛所佛光觸身驚喜無  
量卽時兩目卽得開明乃見如來四衆圍遶身色晃  
昱如紫金山感戴殊澤喜不自勝前詣佛所五體投  
地爲佛作禮作禮畢訖異口同音共白佛言唯願垂

矜聽在道次時佛告曰善來比丘鬚髮自墮法衣在  
身重爲說法得阿羅漢爾時阿難見諸盲人肉眼明  
淨又盡諸漏成阿羅漢長跪合掌前白佛言世尊出  
世實復奇特所爲善事不可思議又此諸盲人特蒙  
殊澤肉眼旣明復獲慧眼世尊出世正爲此等佛告  
阿難我非但今日除其冥闇乃往久遠無量劫時亦  
爲此等除大黑闇阿難白佛不審世尊過去世中爲  
此除闇其事云何佛告阿難乃昔久遠無量無數阿  
僧祇劫此閻浮提五百賈客共行曠野經由嶮路大  
山谷中極爲黑闇時諸商人迷悶愁憂恐失財物此

處多賊而復怖畏咸共同心向于天地日月山海一切神祇啼哭求哀時薩薄王愍諸商客迷悶之苦便告言曰汝等莫怖各自安意吾當爲汝作大照明是時薩薄卽以白氈自纏兩臂酥油灌之然用當炬將諸商人經於七日乃越此闇時諸賈客感戴其恩慈敬無量各獲安隱喜不自勝佛告阿難爾時薩薄豈異人乎我身是也我從昔來國城妻子及以肉血恒施衆生以是之故今致特尊爾時五百諸賈客者豈異人乎今此五百比丘是也過去世時以生死力施其光明今得成佛亦施無漏慧眼爾時衆會聞佛所

說有得須陀洹斯陀含阿那含阿羅漢有種辟支佛善根或發無上道意度者甚多慧命阿難及諸衆會聞佛所說歡喜奉行

### 富那奇緣品第二十九

如是我聞一時佛在舍衛國祇樹給孤獨園爾時放鉢國有一長者名曇摩羨此言法軍於彼國中巨富第一時長者妻生一男兒值出軍征伐餘國因字其兒號曰羨那此言軍也後復生兒值王出軍征討得勝復字其兒號見比耆陀羨那此言勝軍二子長大各爲娶妻爾時長者遇疾困篤數召諸醫瞻養其病看視醫師甘饌盡供

醫貪利養欲遺殘病逆懷姦詐更與餘藥使病不瘥時有一婢供養長者飲食湯藥恒知時宜白長者言從今以去此諸醫師不足更喚惡意相誤病更不瘥今我自當如前法度隨病所須更莫喚醫婢便看養長者得瘥於是其婢白長者言大家我看大家瞻視供養病得除瘥唯當垂愍賜我一願長者告曰卿求何等時婢便言欲得大家與我共通若不見違當從我志長者不逆卽遂其願交通已竟便覺有身時婢懷妊十月已滿生一男兒其願滿足故因字其兒名富那奇此言滿願端正福德宜於錢財善能估販種植治

生倍獲盈利所至到處無有不吉難度稟受長者遺體才藝智量出過人表然是屬賤奴婢所生不及兒次名在奴例爾時長者復娶痼疾乃篤著床將死不久遺言慇懃告其二子吾設沒後慎勿分居長者被病雖服醫藥不能救濟奄致命終爾時二子承用父教共居一處經歷年載值時有緣欲至他國貿作治生各以家居婦兒付囑富那奇爲我看視斯等大小及家餘事悉用相累正爾別去於時富那奇卽受其教營理家事時二兒子數往其所求索飲食及餘所須時富那奇稱給其意隨其所求買索與之卒值一

日無錢持行勝軍小兒白富那奇我今飢渴與我飲食手中無錢索食叵得小兒瞋恚往語其母今富那奇懷情不普見伯父兒隨意給稱我從索食獨不見與母聞兒言恨心便生云此婢子敢懷偏心勝軍還家其婦及兒忿心未息具以上事向勝軍說勝軍聞之倍懷憤怒此婢子奴敢違我教薄賤我兒吾當殺之懷情已定求兄分居兄敬父勅卽時不可勝軍懊惱數求不止兄見意盛察其所規知弟懷恚意不得已即可其言聽各分居弟以家財一切所有養生園宅用作一分以富那奇用作一分以此二分恣兄取

之謂兄取財規自取富那奇而欲殺之兄知勝軍心害富那奇慈心憐愍取富那奇空將妻子單聲來出依餘家住時富那奇問其嫂曰與我少錢欲用買薪兄嫂答曰唯有五錢卽解用與時富那奇持此五錢詣市買薪見一束薪賣索五錢時富那奇卽買其薪雇以五錢尋見牛頭栴檀香木摩以塗身以除其病舉國推覓求之叵得卽令國內誰有香木一兩當與黃金千兩時富那奇往應王墓持一小段用奉王家王如本令

80 1 2 3 4 5 6 7 8 9 10

償千兩金如是展轉十段香木悉皆售盡得金萬兩  
因用起居園田舍宅象馬車乘奴婢畜生家業於是  
豐富具足過踰於前合居數倍爾時復有五百賈客  
相與結要欲入大海喚富邢奇共爲伴侶富邢白兄  
求共採寶兄卽聽之給其所須及伴往至大海如意  
取寶自重而還來至中道艱難之處衆人咸見一浮  
提內有三日現怪問導師今三日出是何瑞應導師  
答言汝等當知一是正日二是魚眼其間白者此是  
魚齒今水所投黑冥之處是魚口也最爲可畏我等  
今者無復活路臨至魚口定計垂死有一賢者敬信

佛道告語衆賈唯當虔心稱南無佛三界德大無過  
佛者救厄赴急矜濟一切最能覆護苦厄衆生唯佛  
神聖願救危險濟此諸人毫釐之命時摩竭魚聞稱  
佛名卽還閉口沉竄海底衆賈於是安隱還國時富  
邢奇取大金案以諸妙寶摩尼珠等莊累積滿奉兄  
羨邢長跪仰望白大兄言我已爲兄積畜財寶舍宅  
所有一切具足子孫七世食用不盡唯願大兄聽我  
出家羨邢答曰吾不相違但卿少年未達人倫佛法  
要重持之甚難比更數年乃可遂意富邢奇曰大兄  
當知人命無常斯須難保前在大海值摩竭魚吸船

趣口命危垂死蒙佛神恩得濟餘命唯念垂許聽在道次兄卽聽之時富那奇與其五百採寶之衆咸以信心至舍衛國到於佛所禮敬問訊因具白佛求索出家佛卽許可聽使入道讚言善來便成沙門佛爲種種苦切說法五百比丘心意開解盡諸苦際成阿羅漢唯富那奇結使深重佛爲說法未能暢達精誠因篤始入初果勤精修習無有休懈時諸比丘安居日近佛聽各各隨意安居時富那奇往白佛言弟子欲往至放鉢國安居三月唯願見聽於時世尊告富那奇彼國人惡信邪倒見汝今初學於佛法中未能

具足佛法聖行設爲彼人見毀辱者當奈之何富那奇曰設令被人極理毀辱但莫見害世尊又告彼人極惡設被害時當復云何富那奇曰世尊當知正使彼人毀辱加害莫斷我命猶戢其恩佛又告曰汝往至彼忽遭惡人殘害汝命無益於汝當如之何富那奇言世尊當知一切萬物有形歸無彼若殺我分受其死於時世尊告富那奇彼諸惡人毀辱加害及未斷命汝當瞋不富那奇曰不也世尊正使彼人無根見謗毀辱極世不軌之事設加刀杖打害次殺復未殘戮臨當斷命終不一念生起恚心佛卽讚言善哉

善哉弟子所行唯是爲快時富那奇攝持衣鉢禮佛  
辯退至放鉢國明日晨旦入城乞食至一大富婆羅  
門家時婆羅門見是比丘卽懷惡心而來罵逐比丘  
卽往異家乞食自其明日續其舍乞食時婆羅門復  
過打極手比丘歡喜顏色不變時婆羅門覩此比丘  
見毀被害苦因垂死而無怨色不生瞋恨便自悔責  
懺謝已過時富那奇於彼國中勤修不懈盡諸結使  
心忽開解獲無漏證安居已竟便辯檀越囑及其兄  
慎勿入海大海中難甚多無數兄之財寶足用七世  
及已竟還往佛所稽首問訊問訊訖竟隨意住止

時兄羨那不惟其勑有諸衆賈來歸羨那種種曉喚  
共入大海羨那不逆即可共去至海渚上隨意自重  
唯有羨那多取牛頭栴檀香木滿船而還龍性慳惜  
惜其香木卽於道中捉其船舫舉帆羅風不能得過  
一切衆客定計恐死羨那一心稱富那奇今遭苦厄  
願見拔濟時富那奇在舍衛國祇洹精舍坐禪思惟  
遙以天耳聞兄羨那處在危厄至心自陳悲酸一心  
稱富那奇富那奇卽以羅漢神足猶如健夫屈伸臂  
頸變身化作金翅鳥王至於大海恐感其龍龍見鳥  
形怖入海底衆賈於是安隱還家時富那奇教化其

兄令爲世尊立一小堂覆堂材木純以栴檀其堂已成教化其兄請佛羨那答曰請佛之宜以何等物能屈世尊時富那奇俱與其兄辦足供養各持香爐共登高樓遙向祇洹燒香歸命佛及聖僧唯願明日臨顧鄙國開悟愚蒙盲冥衆生作願已訖香煙如意乘虛往至世尊頂上相結合聚作一煙蓋後遙以水洗世尊足水亦從虛猶如釵股如意到世尊足上爾時阿難覩見是事怪而問佛誰放煙水佛告阿難是富那奇羅漢比丘於放鉢國勸兄羨那請佛及僧故放煙水以爲信請因勅阿難往至僧中行籌告語神

足比丘明日悉來往往應羨那請因現變化以遊彼國阿難奉命合僧行籌有神足者明當受請時諸比丘各各受籌明日晨旦僧作食人名奇處直奇此言其人已得阿那含道恒日供給一切衆僧結跏趺坐放光明四出照曜引作食具瓢杓健支百斛大金而隨其後乘虛飛行趣向其國羨那問曰是汝師不答言非也是諸比丘作食之人故來相佐辦具飲食於是羨那卽以華香妓樂供養供養畢竟卽便過去次後復有十六沙彌均提之等各以神足變作樹林採華採果種種變現演身光明晃曜天地凌虛繼邁駱

驛而到羨那復問是汝師不答曰非也斯諸人等先  
前來者乃是我等同師弟子年始七歲得羅漢道諸  
漏永盡神足純備今故先來採華具果卽以華香具  
足供養供養訖已各各過去次復者年大阿羅漢化  
作千龍結身爲座頭皆四出雷吼震天其諸龍口悉  
雨七寶復於其上施大寶座飛昇虛空身放光明照  
曜天下而來至國羨那復問是汝師不答曰非也是  
師弟子名惰陳如佛初得道在鹿野苑初轉法輪廣  
度衆生斯等五人最先受化於弟子中第一上首神  
通具足無所罣礙羨那聞說倍加恭敬香華妓樂悉

以供養供養已訖卽便過去次後復有摩訶迦葉化  
作七寶講堂七寶莊校奮身光明晃昱四布往至其  
國羨那見之間富那奇是汝師不答曰非也是師弟  
子摩訶迦葉清儉知足常行頭陀愍諸廝賤賑濟貧  
乏羨那卽以香華妓樂供養畢訖卽時過去時舍利  
弗次後乘千師子槃身爲座頭皆四出口雨七寶雷  
吼咆哮震動天地復於其上敷大寶牀莊校嚴飾而  
處其上身出光明普照四域飛騰虛空翔而至羨  
那問曰是汝師不答曰非也今乘來者是師大弟子  
廣博大智名舍利弗羨那聞已倍增歡喜卽以華香

妓樂供養供養訖已卽以過去時大目連尋後而發化作千象羅頭四出其諸象口皆有六牙其一牙頭有七浴池水一一池中有七蓮華其一華上有七玉女種種變現其數無量放大光明感動四隣復於其上安置寶座自坐其上乘虛徑至羨那問曰是汝師不答言非也是師弟子名大目連神足第一德行純備羨那聞說歡喜戴仰香華妓樂而以供養供養已卽便過去次後復有阿那律提而自化作七寶浴池浴池中復生金色蓮華蓮莖皆是七寶合成處其莖上結跏趺坐項佩日光照曜天下光所照處皆是金

色乘虛至國羨那復問是汝師不答言非也是師弟子阿那律提於是大衆天眼第一羨那聞之歡喜恭敬華香供養卽自過去次後復有佛弟難陀化作千馬駕七寶車車上復有七寶大蓋放演光明四出照曜乘虛馳至詣放鉢國羨那見之間富那奇是汝師不答言非也是世尊弟名曰難陀衆相具足德行純備羨那卽以香華妓樂供養畢訖卽自過去時須菩提次後復來作七寶山坐瑠璃窟身放種種雜色光明照曜天地來至其國羨那問曰是汝師不答言非也是師弟子名須菩提廣智多聞解空第一卽以華

香供養畢訖卽自過去次有分耨文陀尼子化作一千迦樓羅王結身爲座四向羅頭口含衆寶發哀和音復於其上施大寶座而坐其上乘虛來至羨那問曰是汝師不答言非也是我同師名曰分耨文陀尼子辯才應適最爲第一卽以華香供養訖已便自過去次復弟子名優波離化作千鴈聚身相結頭口出聲哀鳴相和口含衆寶飛翔虛空於其身上敷衆寶座放大光明照曜四遠身坐其上馳奔來至羨那問曰是汝師不答曰非也是師弟子名優波離於衆比丘持律第一羨那聞已卽持華香供養畢訖卽復過

去次後復有沙門二十億化作行樹於虛空中以紺瑠璃作經行道復以七寶夾樹兩邊種種妙寶以界道側於中經行漸至其國羨那問曰是汝師不答曰非也是佛弟子名曰沙門二十億於比丘中精進第一華香妓樂供養畢訖卽便過去次後復有大劫賓寧化作七寶樹樹上復有種種華果樹下皆有七寶高座處其座上放大光明乘虛來至羨那問曰是汝師答曰非也是佛弟子名劫賓寧挺特勇猛端正第一羨那聞已歡喜供養華香妓樂供養已訖卽自過去次有弟子名賓頭盧埵闍坐寶蓮華項佩日光

放千光明暉赫天地飛昇虛空來至其國羨那問曰是汝師不答曰非也是師弟子名賓頭盧埵闍善能入定坐禪第一卽以香華供養畢訖卽自過去次羅睺羅尋後趣引自化其身作轉輪王千子七寶皆悉具足導從前後來至其國羨那問曰是汝師不答曰非也是佛之子名曰羅睺羅設在家者領四天下七寶自至兵仗不用自然降附今捨此位出家學道得阿羅漢六通清徹無所罣礙今故變身作是形位羨那聞已香華供養卽自過去五百神足弟子各各現變不可稱計爾時世尊知諸弟子盡適彼國放大光

明照曜天地普皆金色時富那奇語其兄曰今者世尊始欲發意而來至此故先放光作是瑞應爾時世尊始於座上下足躡地應時天地六反震動時富那奇語其兄曰今者世尊始於座上下足躡地以是之故天地大動爾時世尊始出精舍住在於外八金剛神住於八面時四天王在前導道時天帝釋從諸欲界天子百千萬衆侍衛左面大梵天王與色界諸天無央數衆住在右面弟子阿難住在佛後大衆圍遶放演光明照曜天地飛昇虛空趣放鉢國於其中道逢五百作人以千具犧牛墾治隴畝諸牛見佛乘空

而過身放金色普照世界諸牛至心仰視世尊心存  
篤敬住隴不行作人見牛仰向觀瞻驚怪所以亦視  
見佛卽各跪白咸興歸誠唯願如來當見哀愍暫下  
開度使離生死佛以悲心知其可度卽下爲說種種  
妙法五百作人心意開悟斷二十億洞然之惡成須  
陀洹時牛命終盡生天上普皆歡喜於時如來卽復  
發引到前未遠有五百童女共遊曠野見地金色仰  
視其變見乘虛而行咸懷歡喜又手白言唯願天尊  
垂心矜愍暫見濟度佛知其宿行應可度化卽稱所  
願往至其所隨應堪能爲說諸法信受開解成須陀

洹變感已竟遂步而至復有五百仙人處在林澤見  
光普照地悉金色仰觀如來與諸大衆遊行乘虛心  
懷踊躍敬心倍隆仰請佛言唯願大聖暫勞神形因  
見過度聽在道次佛覩其本緣知之應度尋下在前  
求作沙門佛卽聽之善來比丘便成沙門因爲說法  
心淨開解諸漏永盡成阿羅漢隨從佛後乘空而至  
時富那奇遙見佛來光曜天地大衆虛轉語兄羨那  
美那合家供辦甘餚自行澡水敬意奉食佛爲嗟覲

食訖澡漱爲其舉國合家大小演說妙法合家一切  
得須陀洹有具二道三四果者復有發意趣大乘者  
復有堅住不退地者佛說法訖舉國男女得度者衆  
不可稱計阿難長跪又手合掌前白佛言不審世尊  
此富邢奇過去世中作何惡行爲人下賤屬他爲奴  
復有何福遇佛得度佛告阿難欲知之者明聽善思  
當爲汝說對曰唯願願具開示佛告阿難乃往過去  
迦葉佛時有一長者財富無數爲佛衆僧典僧伽藍  
衣服飲食病瘦醫藥四事供辦供給一切無有乏短  
爾時長者遇疾命終其後一兒出家學道其父死後

佛圖供具皆悉轉少衆僧罷散其寺荒壞無人住止  
其兒比丘勤力招合檀越知識積聚錢財修補缺落  
復合衆僧還繼供養於時多衆住在其寺勤精專修  
具諸道者時彼道人作僧自在時有羅漢道人次知  
日直掃除草土積在中庭不時除棄於時比丘惡心  
呵叱今此比丘如奴無異雖知掃地不能除棄阿難  
當知彼時比丘大自在者今富邢奇比丘是也由其  
惡心呵得道人比之爲奴由此一言五百世中恒爲  
奴身復由興立勸合衆人供養衆僧償罪已畢復遭  
我世蒙得過慶今此國中受化之人皆是往昔勸助

之衆緣是果報皆得度脫阿難之等及與衆會聞佛所說歡喜奉行

尼提度緣品第三十

如是我聞一時佛在舍衛國祇樹給孤獨園爾時舍衛城中人民衆多居止隘迮廁溷渺少大小便利多往出城或有豪尊不能去者便利在器中雇人除之時有一人名曰尼提極貧至賤無所趣向仰客作除糞得價自濟爾時世尊卽知其應度獨將阿難入於城內欲拔濟之到一里頭正值尼提持一瓦器盛滿不淨欲往棄之遙見世尊極懷鄙愧退從異道隱屏

欲去垂當出里復見世尊倍用鄙恥迴趣餘道復欲避去心意忽忙以瓶打壁瓶卽破壞尿尿澆身深生慙愧不忍見佛是時世尊就到其所語尼提言欲出家不尼提答言如來尊重金輪王種翼從弟子悉是貴人我下賤弊惡之極云何同彼而得出家世尊告曰我法清妙猶如淨水悉能洗除一切垢穢亦如大火能燒諸物大小好惡皆能焚之我法亦爾弘廣無邊貧富貴賤男之與女有能修者皆盡諸欲是時尼提聞佛所說信心卽生欲得出家佛使阿難將出城外大河水邊洗浴其身已得淨潔將詣祇洹爲說經

法苦切之理生死可畏涅槃永安霍然意解獲初果  
 證合掌向佛求作沙門佛即告曰善來比丘鬚髮自  
 落法衣在身佛重解說四諦要法諸漏得盡成阿羅  
 漢三明六通皆悉具足爾時國人聞尼提出家咸懷  
 憎心而作是言云何世尊聽此賤人出家學道我等  
 如何爲其禮拜設作供養請佛及僧斯人若來汙我  
 牀席展轉相語乃聞於王王聞亦怨恨情用反側卽  
 乘羽葆之車與諸侍從往詣祇洹欲問如來所疑之事  
 旣到門前且小停息祇洹門外有一大石尼提比丘  
 坐於石宕縫補故衣有七百天人各持華香而供

養之右遶敬禮時王覩見深用歡喜到比丘所而語  
 之言我欲見佛願爲通白比丘卽時身沒石中踊出  
 於內白世尊曰波斯匿王今者在外欲得來入覩省  
 謩問佛告尼提從汝本道往語令前尼提尋時還從  
 石出如似出水無有星礙卽語王言白佛已竟王可  
 進前王作此念向所疑事且當置之先當請問此比  
 丘者有何福行神力乃爾王入見佛稽首佛足右遶  
 三匝卻坐一面白世尊言向者比丘神力難及入石  
 如水出石無孔姓字何等願見告示世尊告曰是王  
 國中極賤之人我已化度得阿羅漢大王故來欲問

斯義王聞佛語慢心卽除欣悅無量因告王曰凡人處世尊卑貴賤貧富苦樂皆由宿行而致斯果仁慈謙順敬長愛小則爲貴人凶惡強梁憍恣自大則爲賤人波斯匿王白世尊言大聖出世多所潤濟如此凡陋下賤之人拔其苦毒使常安樂此尼提者有何因緣生於賤處復種何德得遇聖尊稟受仙化尋成應真唯願世尊敷演分別佛告王曰諦聽善持吾當解說令汝開悟乃往過去迦葉如來出現世間滅度之後有比丘僧凡十萬人中有一沙門作僧自在身有疾患服藥自下憊懶恃勢不出便利以金銀澡槃

就中盛屎令一弟子擔往棄之然其弟子是須陀洹由在彼世不能謙順自恃多財秉捉僧事暫有微患懶不自起驅役聖人令除糞穢以是因緣流浪生死恒爲下賤五百世中爲人除糞乃至於今由其出家持戒功德今值我世聞法得道佛告大王欲知爾時僧自在者今尼提比丘是波斯匿王白世尊言如來出世實爲奇特利益無量苦惱衆生佛告大王善哉善哉如汝所言佛又告曰三界輪轉無有定品積善仁和生於豪尊習惡放恣便生卑賤王大歡喜無有慢心卽起長跪執尼提足而爲作禮懺悔自謝願除



王復問言其中國者號字云何商客啓曰名羅悅祇  
 又名舍衛其數衆多不能具宣復問言中國諸王以  
 何等故不來獻我商客啓曰各自霸土威名相齊以  
 是之故不來奉耳王自思惟今我力勢能總攝一  
 切天下何緣諸王不來承貢今當加威令從率伏復  
 問商客中國諸王何者最大商主白言舍衛國王爲  
 最第一爾時金地王卽便遣使詣舍衛國持書示教  
 其理委備告語其王波斯匿言我之威風徧閭浮提  
 卿爲所恃斷絕使命今故遣使共卿相聞卿若臥時  
 聞我聲者尋應起坐若坐聞者尋時應立若食聞聲

應卽吐哺若沐聞聲尋卽握髮若住時聞應卽相趣  
 卻後七日與我相見設不如是吾當興兵破汝國界  
 波斯匿聞深用驚惶卽往詣佛具白斯事佛告王言  
 王還語使云我大更有大王王奉佛教告彼使言世  
 有聖王近在此間卿可到邊傳汝王命使卽時往詣  
 於祇洹于時世尊自變其形作轉輪王令目連作典  
 兵臣七寶侍從皆悉備有又化祇洹令作寶城繞過  
 有七重塹其間皆有七寶行樹雜色蓮華不可稱計  
 光明晃晃照然赫發城中宮殿亦是衆寶王在殿上  
 尊嚴可畏於是彼使前入化城旣覩大王情甚驚悚

自念我君無狀招禍然不得已以書示之化王得書踰著脚下告彼使言吾爲大王臨統四域汝王頑迷敢見遠拒汝速還國致宣吾教信至之日馳奔來觀臥聞當起坐聞應立立聞吾令便當涉道剋期七日不得稽遲敢違期制罪在不請使受教竟還詣本國具以聞見白金地王王承斯問深自咎責合率所領諸小王輩嚴辦車馬欲朝大王然有所疑未便卽路先遣一使白大王言臣所總秉三萬六千王爲當都去將半去耶大王還報聽半畱住但將半來時金地王將萬八千小王同時來到旣見化王謁拜畢已心

作是念大王形貌雖復勝我力必不如化王于時勅典兵臣以弓與之金地國王手不能勝化王還取以指張弓復持與之勅令引挽金地國王殊不能挽化王復取而彈扣之三千世界皆爲震動次復取箭彎弓而射離手之後化爲五發其諸箭頭各各出無數光明其光明頭皆有蓮華大如車輪一一華上各各皆有一轉輪王七寶具足奮演光明普照三千大千世界五道衆生莫不蒙賴諸天境界見其光明及聞說法身心清淨有得道果第二第三道者有發無上正真道意復有得住不退地者人道衆生見佛光

經一卷六

明及聞所說心生踊躍其中有得一道二道三道之者出家入要得應真者有發無上正真道意得不退地不可稱計餓鬼中者見佛光明及聞所說皆得飽滿身心清淨無諸熱惱皆生慈心恭敬於佛即得解脫生人天中畜生中者見佛光明貪欲瞋毒皆得消除癡心朦冥尋得醒悟皆悉歡喜信敬於佛即得解脫生人天中地獄中者見佛光明寒則溫煖熱則清涼苦痛之處即得休息身心踊躍恭敬於佛即得解脫生天人中爾時摩訶劫賓寧王金地諸王見斯變已其心信伏遠塵離垢得法眼淨萬八千王一時皆

然須臾之頃佛攝神力還復本形諸比丘僧前後圍遶金地王衆求索出家佛即聽許鬚髮自墮袈裟在體思惟妙法盡得阿羅漢果阿難白佛此金地王宿種何行生在豪尊功德巍巍遭值佛世逮成無漏佛告阿難衆生由行受其果報乃往過去有迦葉佛般涅槃後有一長者爲起塔廟造作堂閣四供養具歲月漸久而塔崩落牀褥衣食亦復斷絕其主長者有子比丘便行勸化人民之類各令減割用治斯塔又設飲食牀臥之具諸人同心咸共供承因發誓願願當來世富貴長壽遭值佛世聞法獲證行報無遺皆

令果成佛告阿難爾時長者子比丘者今金地王摩訶劫賓寧是其諸人民受道化者今萬八千諸王是也佛說是法衆會聞者逮得道證發心不退受持至教歡喜奉行

### 微妙比丘尼緣品第三十二

聞如是一時佛在舍衛國祇陀精舍波斯匿王崩背之後太子瑠璃攝政爲王暴虐無道驅逐醉象踰殺人民不可稱計時諸貴姓婦女見其如是心用憔悴不樂於俗卽共出家爲比丘尼國中人民見諸女人或是釋種或是王種尊貴端正國中第一悉捨諸欲

出家爲道凡五百人莫不歎美競共供養諸比丘尼自相謂言吾等今者雖名出家未服法藥消除怒癡寧可共詣鉢蘭難陀比丘尼所諮詢受經法冀獲所曉卽往其所作禮問訊各自陳言我等雖復爲道未獲甘露願見開悟時鉢蘭難陀心自念言我今當教令戒作比丘尼辛苦如是不如還家夫婦男女共相娛樂恣意布施可榮一世諸比丘尼聞說是語心用憫然卽各涕泣捨之而去復至微妙比丘尼所前爲作

卷之三

三

古

禮問訊如法卽各啓曰我等在家習俗迷久今雖出家心意蕩逸情欲煩熾不能自解願見憐愍爲我說法開釋罪蓋爾時微妙卽告之曰汝於三世欲問何等諸比丘尼言去來且置願說現在解我疑結微妙告曰夫婬欲者譬如盛火燒于山澤蔓延滋甚所傷彌廣人坐婬欲更相賊害日月滋長致墮三塗無有出期夫樂家者貪於合會恩愛榮樂因緣生老病死離別縣官之惱轉相哭戀傷壞肝心絕而復稣在家深固心意纏縛甚於牢獄我本生於梵志之家我父尊貴國之第一爾時有梵志子聰明智慧聞我端正

卽遣媒禮娉我爲婦遂成室家後生子息夫家父母轉復終亡我時妊娠而語夫言我今有身穢污不淨日月向滿儻有危頓當還我家見我父母夫卽言善遂便遣歸至於道半身體轉痛止一樹下時夫別臥我時夜生汚露大出毒蛇聞臭卽來殺夫我時夜喚數反無聲天轉向曉我自力起往牽夫手知被毒蛇身體腫爛支節解散我時見此卽便悶絕爾時大兒見父母死失聲號叫我聞見聲卽時還蘇便取大兒擔著頸上小者抱之涕泣進路道復曠險絕無人民至於中路有一大河旣深且廣卽畱大兒著於河邊

先擔小兒渡著彼岸還迎大者見遙見我卽來入水  
水便漂去我尋追之力不能救浮沒而去我時卽還  
欲趣小兒狠已歟訖但見其血流離在地我復斷絕  
良久乃蘇遂進前路逢一梵志是父親友卽問我言  
汝從何來困憊乃爾我卽具以所更苦毒之事告之  
爾時梵志憐我孤苦相對涕哭我問梵志父母親里  
盡平安不梵志卽答我言汝家大小近日失火一時  
死盡我時聞之卽復悶絕良久乃蘇梵志憐我將我  
歸家供給無乏看視如子時餘梵志見我端正求我  
爲婦卽相可適共爲室家我復妊娠日月已滿時夫

出外他舍飲酒日暮來歸我時欲產獨閉在內時產  
未竟梵志打門大喚無人往開梵志瞋恚破門來入  
卽見搥打我如事說梵志遂怒卽取兒殺以酥熬煎  
逼我使食我甚愁惱不忍食之復見搥打食兒之後  
心中酸結自惟薄福乃值斯人卽便亡去至波羅柰  
在於城外樹下坐息時彼國中有長者子適初來婦  
乃於城外園中埋之戀慕其婦日往出城塚上涕哭  
彼時見我卽問我言汝是何人獨坐道邊我如事說  
復語我言今欲與汝入彼園觀寧可爾不我便可之  
遂爲夫婦經歷數日時長者子得疾不救奄忽壽終

80 1 2 3 4 5 6 7 8 9

10

11

12

13

14

15

16

時彼國法若其生時有所愛重臨葬之日并埋塚中  
 我雖見埋命故未絕時有羣賊來開其塚爾時賊帥  
 見我端正卽用爲婦數旬之中復出劫盜爲主所覺  
 卽斷其頭賊下徒衆卽將死屍而來還我便共埋之  
 如國俗法以我并埋時在塚中經乎三日諸狼豺狗  
 復來開塚欲噉死人我復得出重自剋責宿有何殃  
 旬日之間遇斯罪害死而復生當何所奉得全餘命  
 卽自念言我昔嘗聞釋氏之子棄家學道道成號佛  
 達知去來寧可往詣身心自歸卽便徑往馳趣祇洹  
 遙見如來如樹華茂星中之月爾時世尊以無漏三

達察我應度而來迎我我時形露無用自蔽卽便坐  
 地以手覆乳佛告阿難汝持衣往覆彼女人我時得  
 衣卽便稽首世尊足下具陳罪厄願見垂愍聽我爲  
 道佛告阿難將此女人付瞿曇彌令授戒法時大愛  
 道卽便授我作比丘尼卽爲我說四諦之要苦空非  
 身我聞是法剋心精進自致應真達知去來今我見  
 世所受勤苦其可具陳如宿所造毫分不差時諸比  
 丘尼重復啓曰宿有何咎而獲斯殃唯願說之微妙  
 答曰汝等善聽乃往過去有一長者財富無數無有  
 子息更取小婦雖小家女端正少雙夫甚愛念遂便

有身十月已滿生一男兒夫婦敬重視之無厭大婦  
自念我雖貴族現無子息可以繼嗣今此小兒若其  
長大當領門戶田財諸物盡當攝持我唐勤苦積聚  
財產不得自在妬心卽生不如早殺內計已定卽取  
鐵針刺兒顛上令沒不現兒漸稍病旬日之間遂便  
命終小婦懊惱氣絕復蘇疑是大婦妬殺我子卽問  
大婦汝之無狀怨殺我子大婦卽時自呪誓曰若殺  
汝子使我世世夫爲毒蛇所殺有兒子者水漂狼噉  
身現生理自噉其子父母大小失火而死何爲謗我  
何爲謗我當於爾時謂無罪福反報之殃前所呪誓

今悉受之無相代者欲知爾時大婦者則我身是諸  
比丘尼重復問曰復有何慶得覩如來就迎之耶得  
在道堂免于生死微妙答曰昔波羅柰國有大山名  
曰仙山其中恒有辟支佛聲聞外道神仙無有空缺  
彼時緣覺入城乞食有長者婦見之歡喜卽供養之  
緣覺食已飛昇虛空身出水火坐臥空中婦時見之  
卽發願言使我世世得道如是爾時婦者則我身是  
難得羅漢恒熱鐵針從頂上入於足下出晝夜患此  
疾復竟已殃禍如是無有朽敗爾時五百貴姓比丘

尼聞說是法心意悚然觀欲之本猶如熾火貪欲之心永不復生在家之苦甚於牢獄諸垢消盡一時入定成羅漢道各共齊心白微妙曰我等纏綿繫著姪欲不能自拔今蒙仁恩得度生死時佛歎曰快哉微妙夫爲道者能以法教轉相教成可謂佛弟子衆會聞說莫不歡喜稽首奉行

梨耆彌七子緣品第三十三

如是我聞一時佛在舍衛國祇樹給孤獨園爾時波斯匿王有一大臣名梨耆彌家居大富生七男兒爲其妻娶已至于六殘第七子當爲求婦自思惟言吾

年衰邁餘唯一見爲之納室要令殊勝時此長者有一親厚婆羅門來共相見因議語曰今我欲爲小兒求婚未能知處卿自昔來遊行諸國今欲煩君爲我推覓若見有女端正賢智性命相宜適我子意乃當求之時婆羅門即便然可徧行覓到特又尸利國見有五百童女羣行遊戲採取好華用作拂飾此婆羅門隨逐觀之轉復前行當渡少水諸女子輩皆脫革屣中有一女獨而不脫革屣入水轉復前行續更有河衆女褰衣爾乃入水唯此一女獨笄衣入前行林間諸女各各上樹採華時此一女自不上樹從他索

之得華甚多時婆羅門問此女言我有小疑欲得相  
問其女答曰有疑便問婆羅門言向者諸女當入水  
時盡脫革屣汝獨不脫有何意故時女答曰汝疑何  
甚所以作屣正用護脚陸地之事眼有所見荆棘瓦  
石可得避之水底隱匿眼所不覩儻有棘刺及諸毒  
蟲傷害人脚是以不脫時婆羅門復更問言以何事  
故并衣入水時女答言女人之身相有好惡褰衣入  
水爲人所見相好則可不好嗤笑以是事故而不褰  
之時婆羅門復更問言以何緣故獨不上樹女便答  
言若當上樹樹枝儻折危害人身以是事故而不上

耳此女卽是波斯匿王弟曇摩訶羨女也羨昔因罪  
逃奔彼國便於彼土安家納娶而生斯女字毗舍離  
時婆羅門聞女所說知必賢能而問女言汝父母在  
不女答曰在遂逐到門求共相見女入白父外有婆  
羅門欲見大人時曇摩羨便出見之間訊已竟而語  
之言向者女子是君女不答言是也爲有主未答言  
未也婆羅門言舍衛國中有一大臣字梨耆彌君識  
之不答言舊識婆羅門言是梨耆彌最下小兒端正  
聰明欲求君女共爲婚姻可得爾不曇摩羨言彼是  
豪姓本與匹偶苟其欲得情在無違已蒙許可便共

剋日爾時有伴往舍衛國時婆羅門卽作書疏與梨耆彌陳說事狀長者聞已辦具聘物車馬騎乘往特又尸利國漸近欲到先遣使往時曇摩羨善加敬待卽設賓會以女妻之諸事畢竟當還舍衛時此女母於衆人前囑其女言自今已後常著好衣恒食美飯日日照鏡莫令斷絕女卽長跪奉受教勅梨耆彌聞陰用爲恨人生一世苦樂無定好衣飲食如何得常恒照明鏡斯亦非理雖有此念難不問之客主相辯於是別去大小徒侶進引歸國於道中間有一客舍四面垂軒極爲清涼其先到者在下休息兒婦後至

啓白公言此不可住速出向外公不違之出向露處左右數人不肯出去時有象馬身體瘙痒以身揩柱屋卽房壞鎮殺下人時梨耆彌作是念言我今脫死由是兒婦敬遇之心倍益隆厚卽便駕乘進路而歸到一大澗草茂水美衆人息駕側澗而住兒婦後到便語之言住此不快速出岸上卽用其言遠澗休息須臾之頃便有雲起震雷降雨霧靄而下溢澗流來時梨耆彌復重念曰吾等今日再脫於死由此兒婦得全身命復勅嚴駕涉道進前旣達本國中表親里悉來慶問長者欣悅卽設供具共相娛樂終竟一日

賓客旣罷是時長者召諸兒婦而告之曰吾今年高  
厭衆事務家居器物欲有付託卿等諸人誰能爲我  
知藏執鑰六犬兒婦盡辭不堪其第七者自言能任  
于時長者以諸藏鑰悉以付之旣已受命勤謹不懈  
朝夕早起灑掃堂舍炊蒸已竟先飯公姑及諸男女  
後飯奴婢僮僕使人各各分處赴趣作業然後自食  
以是爲常公見忠恪不與凡同怪前母囑而不用之  
便問之曰汝前來時被母教勑好衣美食日照明鏡  
其事云何卿可說之兒婦長跪具答事狀我母所給  
著好衣者體上大衣教使愛護恒令淨潔時間客會

可得鮮妙所勑美食非謂甘肥教使晚飯飢虛得食  
麤細盡美其明鏡者非銅鐵鏡教令早起勤灑掃內  
外整端牀席務令淨潔我母所囑其事如是時公聞  
之知有妙才情存待遇甚倍於前家中衆物悉以委  
之歡喜泰然無復憂慮時有羣鴈飛入海渚食啖粳  
米食之旣飽衝毬翔來當王宮上失墮殿前諸人見  
之取用奉王王見奇好必中作藥勑使畱種莫得棄  
散付與諸臣各令植之時梨者彌亦得少許持至於  
家教令種之兒婦奉取驅率奴僕調和佳田於中下  
種後生滋茂大獲子實諸人種者消息失度悉皆不

生時王夫人歟得篤疾召問諸醫治病所由中有醫  
言當須海渚粳米作食食之爾乃可瘥王自憶念昔  
得其種付人墾植今當推校爲有爲無卽召諸臣而  
問之言前勑種稻爲或熟不今日急須用治困患諸  
臣各自說本末或云不生或云鼠噉時梨耆彌歸  
家問曰前種稻米爲獲實不欲得與王治夫人疾兒  
婦答言家內豐多若用作藥足周一國不但濟一人  
也時梨耆彌卽送與王尋用作食以與夫人夫人食  
已病得除愈王甚歡喜大與賞賜時特又戶利舍衛  
二國共相嫌隙常不和順時特又戶利王欲試舍衛

有賢智不遣一使者至舍衛國送梓馬二匹而是母  
子形狀毛色一類無異能別識者實爲大善王及羣  
臣不能分別時梨耆彌從宮歸家兒婦問言有何消  
息公卽答言如向所見兒婦白言此事易知何足爲  
憂但取好草並頭而與其是母者推草與之其是子  
者推博食之時梨耆彌尋往白王王如其語以草試  
之果如其策母子區別卽語使者斯是馬母彼是其  
駒時使答言審如來語無有差錯王大歡喜倍加爵  
賞時彼來使還歸本國具白諸理時特又戶利王便  
遣使送二蛇麤細長短相似如一能別雌雄者斯亦

大善波斯匿王及諸羣臣無能識者時梨耆彌歸問兒婦此復云何兒婦答言以一端細氈敷置於地取此二蛇用著氈上若是雌者靜然不動其是雄者搔擾不寧何以知之女之爲性愛著細滑得軟生染不欲動搖男子性剛轉側不安以此推之可足知矣長者聞已卽往白王王從其計尋時試之果如所言了了識別告彼使曰是雄是雌使尋報曰審爾不虛王甚慶悅大賜財寶時彼國王復送一木長滿一丈根杪正等無有節姆刀斧之迹而語之曰若能別識此木上下亦大快善甚不可量王及諸臣無能識者時

梨耆彌復問兒婦兒婦答言此事易耳但取其木用著水中根自沉沒頭浮在上長者聞已復往白王王用其語而便試之果如其計沉浮各殊語彼使言浮者是頭沉處是根時使答言信如所論王益歡喜重與賞賜彼使還國具白因緣其王聞之心用信伏更遣使命兼獻珍寶因復語曰大王國中實有賢達自今已後當修義好波斯匿王情倍踊躍召梨耆彌而問之曰頃來諸事卿何由知梨耆彌言非臣所達是臣兒婦之智辯耳國王聞已深加欣敬拜其兒婦用爲王妹復經少時兒婦懷妊日月已滿生三十二卵

其一卵中出一男兒形體顏貌端嚴挺特年遂長大  
勇健無雙一人之力敵於千夫父母敬念合國敬畏  
後爲納娶各已備畢純是國中豪賢之女時毗舍離  
信心開解請佛及僧於舍供養佛爲說法合家眷屬  
得須陀洹唯未小兒未獲道迹時乘白象欲出遊戲  
門外有塹既深且廣於其塹上有大木橋時此少年  
適到橋宕爾時復有輔相之子乘車外來橋中相逢  
各恃豪性不相避毗舍離兒便懷瞋恚就於象上  
低身下向捉輔相子并其車乘擲置塹中身體傷破  
百節皆疼啼哭而歸白其父言毗舍離兒橫見毀辱

傷我身體苦痛若斯其父聞之甚用懊惱恤其子言  
彼人力壯又是國親難與爭勝當思密計以報此怨  
卽以七寶合爲馬鞭三十二枚用好純剛作刀著中  
三十二人各遺一枚而語之言汝等年少體性自嬉  
故作此鞭而用相贈幸可納之恒捉在手諸人歡慶  
便爲受之是時國法見王之時禮不帶刀於是輔相  
已見納受而常秉執便向國王深譖讒之云毗舍離  
三十二人年盛力壯一人敵千今懷異計謀欲害王  
王雖聞之情猶未信復更白王事審不虛現有證驗  
各作利刀置馬鞍中以此推之事足明矣王卽索看

果如所言王意便信謂必爲然選擇力士安在宮內一一召喚於裏殺之以三十二頭盛著一函繫縛封印送與其妹當於是日其毗舍離請佛及僧就家供養見王送函謂爲致供來相助辦便欲開看世尊告曰且住勿解須待食竟飲食已訖便命令坐爲其說法此身無常苦空無我生多危懼不得久立衆惱瘞縛辛酸難計恩愛別離互相悲戀唐困身識於道無益唯有智者能解此要時毗舍離霍然悟得阿那食道歡喜合掌白世尊言嘵垂矜愍見賜四願一者諸病比丘給足湯藥隨病飲食二者看病比丘亦給

其食三者遠來比丘先供養之四者遠行比丘給辦糧餉所以者何諸病比丘由無湯藥好飲食故其病難瘥或復沒命瞻病比丘由無食故當捨乞食早晚無時病人所須或能差錯違心恚怒病則難愈以是之故當施其食時有他方遠來比丘初到異土未有知識若行乞食或值惡狗或逢弊人儻能瞋恚傷損毀辱以是之故當先與食遠去比丘當須伴侶由無糧餉或不逮伴道路遐險多諸毒獸設當獨涉或致危難我以是故當供給之爾時世尊聞毗舍離求此四願讚言善哉善哉如汝所願其德弘大供佛無異

卽與衆僧還到祇洹世尊去後開函視之三十二頭悉在函內由愛斷故不至懊惱但作是念痛哉悲矣人生有死不得長存驅馳五道何苦乃爾三十二兒婦家親族聞此事理極懷瞋恚咸共唱言大王無道枉殺善人共合兵馬欲爲報仇軍衆雲集圍遶王宮時王恐怖退向佛所諸人聞之卽引軍馬往圍祇洹爾時阿難聞波斯匿王殺毗舍離三十二子婦家宗黨欲爲報仇長跪合掌白世尊言有何因緣三十二兒爲王所殺世尊告曰毗舍離子三十二人不但今日爲王所殺三十二人一時頓死汝今善聽持之在

心當爲汝說阿難曰諾佛告阿難乃往過去久遠世時此三十二人共爲親友相與言議盜他一牛彼時國中有一老母無有子息單窮困厄時諸偷兒往詣其舍欲共殺牛老母歡喜爲辦薪水煮熟之具臨當下刀時牛跪乞命諸人意盛必欲殺之牛便設誓汝今殺我將來之世我不置汝正使得道猶不相放立誓已竟便爲所殺諸人燒煮競共斂之老母因次亦得飽滿欣悅而言由來安客今日最善佛告阿難爾時牛者今波斯匿王是爾時盜牛人者今毗舍離三十二子是爾時老母者今毗舍離是由此果報五百

世中常爲所殺乃至於今彼時老母由助喜故五百世中常爲作母極爲懊惱今值我時始獲道證阿難合掌重白佛言復修何福蒙富猛健佛告阿難乃往過去迦葉佛時有一老母信敬三寶其家大富合集衆香以油和之欲往塗塔於其中路逢三十二人因而勸之我欲以由塗塔可相助佐當得福德世世所生端正多力時三十二人歡喜共去塗塔已竟各作是言由是老母故令我等得種於福業願所生處尊榮富貴恒爲我母我等爲子常莫相離見佛聞法疾得道果老母喜悅便許可之從是以來五百世中恒

生尊貴爾時老母今毗舍離是爾時三十二人今三十二子是時諸軍衆聞佛所說恚心便息而作是言大王所刑非造爲之此人自種今受其報由殺一牛猶尚如是波斯匿王是我曹主云何懷惡而欲危害卽除器仗自投王前求哀請過王亦釋然不問其罪爾時世尊因爲四衆廣說諸法善業應修惡行應離敷演分別四諦妙法衆會聞者皆得道證受持佛教

歡喜奉行

設頭羅健寧緣品第三十四

如是我聞一時佛在羅閱祇竹園中爾時賢者阿難

從座而起整衣服長跪又手前白佛言阿若憍陳如  
伴黨五人宿有何慶依何因緣如來出世法鼓初震  
獨先得聞甘露法味特先得嘗唯願垂哀具爲解說  
於時世尊告阿難言此五人者先世之時先食我肉  
致得安隱是故今日先得法食用致解脫爾時阿難  
重白佛言先世食肉有何因緣願具開示佛告之曰  
過去久遠無量無數阿僧祇劫此閻浮提有大國王  
名曰設頭羅健寧領閻浮提八萬四千國六萬山川  
八十億聚落二萬夫人婦女王有慈悲憐念一切人  
民之類靡不蒙賴爾時國中有火星現相師尋見而

白王言若火星現當旱不雨經十二年今有此變當  
如之何王聞是語甚大憂愁若有此災何得民物民  
命不濟無復國土卽令羣臣而共議言衆臣咸曰當  
下諸國計現民口復令筭數倉第現穀知定斛斗十  
二年中人得幾許王從其議卽時宣令急勅筭之都  
計筭竟一切人民日得一升猶尚不足從是已後人  
民飢餓死亡者衆王自念曰嘗設何計濟活人民因  
與夫人媛女出遊園觀到各休息王伺衆眠寐卽從  
座起向四方禮因立誓言今此國人飢羸無食我捨  
此身願爲大魚以我身肉充濟一切卽上樹端自投

於地卽時命終於大河中爲化生魚其身長大五百  
由旬爾時國中有木工五人各齋斤斧往至河邊規  
斫材木彼魚見已卽作人語而告之曰汝等若飢欲  
須食者來取我肉若復食飽可齋持去汝今先食我  
肉又得克飽後成佛時當以法食濟脫汝等汝可并  
告國人大小有須食者悉各來取五人歡喜尋各所  
取食飽齋歸因以其事具語國人於是人民展轉相  
語徧閭浮提悉皆來集噉食其肉一脇肉盡卽自轉  
身復取一脇比復食盡故處還生復轉身與之如是  
翻覆恒以身肉給濟一切經十二年其諸衆生食其

肉者皆生慈心命終之後得生天上阿難欲知爾時  
設頭羅健寧王者則我身是時五人木工先食肉者  
今僑陳如等五比丘是其諸人民後食肉者今八萬  
諸天及諸弟子得度者是我於爾時先以身肉克彼  
五人令得濟活是故今日最初說法度彼五人以我  
法身少分之肉除彼三毒飢乏之苦賢者阿難及諸  
會者聞佛所說且悲且喜頂戴奉行

### 阿輸迦施土緣品第三十五

如是我聞一時佛在舍衛國祇樹給孤獨園爾時世  
尊晨與阿難入城乞食見羣小兒於道中戲各聚地

土用作宮舍及作倉藏財寶五穀有一小兒遙見佛來見佛光相敬心內發歡喜踊躍生布施心卽取倉中名爲穀者卽以手探欲用施佛身小不逮語一小兒我登汝上以穀布施小兒歡喜報言可爾卽躡肩上以土奉佛佛卽下鉢低頭受土受之已訖授與阿難語言持此塗圬我房乞食旣得還詣祇洹阿難以土塗佛房地齊圬一遍其土便盡圬已整衣服具以白佛佛告阿難向者小兒歡喜施土土足塗圬佛房一邊緣斯功德我般涅槃百歲之後當作國王字阿輸迦其次小兒當作大臣共領閻浮提一切國土興

顯三寶廣設供養分布舍利佛聞浮提當爲我起八萬四千塔阿難歡喜重白佛言如來先昔造何功德而乃有此多塔之報佛告阿難專心善聽過去久遠阿僧祇劫有大國王名波塞奇典閻浮提八萬四千國時世有佛名曰弗沙波塞奇王與諸臣民供養於佛及比丘僧四事供養敬慕無量爾時其王心自念言今此大國人民之類常得見佛禮拜供養其餘小國各處邊僻人民之類無由修福就當圖畫佛之形像布與諸國咸令供養作是念已卽召畫師勅使圖畫時諸畫師來至佛邊看佛相好欲得畫之適畫一

處忘失餘處重更觀看復次下手忘一畫一不能使成時弗沙佛調和衆采手自爲畫以爲模法畫立一像於是畫師乃能圖畫八萬四千之像極令淨妙端正如佛布與諸國一國與一又作告下勅令人民辦具華香以用供養諸國王臣民得如來像歡喜敬奉如視佛身如是阿難波塞奇王今我身是緣於彼世畫八萬四千如來之像布與諸國令人供養緣是功德世世受福天上人中恒爲帝王所受生處端正殊妙三十二相八十種好緣是功德自致成佛涅槃之後當復得此八萬四千諸塔果報賢者阿難及諸會

者聞佛所說歡喜奉行

七瓶金施緣品第三十六

如是我聞一時佛在舍衛國祇樹給孤獨園爾時諸比丘各各異國隨意安居經九十日安居已竟各詣佛所諮詢受聖教爾時世尊與諸比丘隔別經久慈心愍傷卽舉千幅相輪神手而慰諭之下意問訊汝等諸人住在僻遠飲食供養得無乏耶如來功德世無儔類今乃下意瞻諸比丘特懷謙敬阿難見之甚怪所以卽白佛言世尊出世最爲殊特功德智慧世之希有今乃下意慰諭問訊諸比丘衆何其善耶不審

世尊興發如是謙卑之言爲遠近耶世尊告曰欲知不乎明聽善思當爲汝說奉教善聽佛告阿難過去久遠無數無量不可思議阿僧祇劫此間浮提有一大國名波羅柰時有一人好修家業意偏愛金勤力積聚作役其身四方治生所得錢財盡用買金因得一瓶於其舍內掘地藏之如是種種勤身苦體經積年歲終不衣食聚之不休乃得七瓶悉取埋之其人後時遇疾命終由其愛金轉身作一毒蛇之身還其舍內守此金瓶經積年歲其舍磨滅無人住之蛇守金瓶壽命年歲已復向盡捨其身已愛心不息復受

本形自以其身纏諸金瓶如是展轉經數萬歲最後受身厭心復生自計由來爲是金瓶而受惡形無有休已今當用施快福田中使我世世蒙其福報思惟計定往至道邊竄身草中匿身而看設有人來我當語之爾時毒蛇見有一人順道而過蛇便呼之人聞呼聲左右顧望不見有人但聞其聲復道而行蛇復現形喚言咄人可來近我人答蛇言汝身毒惡喚我用爲我若近汝儻爲傷害蛇答人言我苟懷惡設汝不來亦能作害其人恐懼往至其所蛇語人言吾今此處有一瓶金欲用相託供養作福能爲之不若不

爲者我當害汝其人答蛇我爲之時蛇將人共至  
金所出金與之又告之曰卿持此金供養衆僧設食  
之日好捨持一阿輸提來取我舉去其人捨金至僧  
伽藍付僧維那具以上事向僧說之云其毒蛇欲設  
供養剗作食日僧受其金爲設美饌作食日至其人  
持一小阿輸提往至蛇所蛇見其人心懷歡喜慰喻  
問訊卽槃其身上阿輸提於是其人以氈覆上捨向  
佛圖道逢一人問擔蛇人汝從何來體履佳不其人  
默然不答彼問再三問之不出一言所持毒蛇卽便  
嗔恚含毒熾盛欲殺其人還自過折復自思念云何

此人不知時宜他以好意問訊進止鄭重三問無一  
言答何可癡耶作是念已毒心復興隆猛內發復欲  
害之臨當吐毒復自思惟此人爲我作福未有恩報  
如是再三還自奄伏此人於我已有大恩雖復作罪  
事宜忍之前到空處蛇語其人下我著地窮責極切  
囑誠以法其人於是便自悔責生謙下心垂矜一切  
蛇重囑及莫更爾耶其人擔蛇至僧伽藍著衆僧前  
於時衆僧食時已到住街而立蛇令彼人次第付香  
自以信心視受香者如是盡底熟看不移衆僧引街  
遶塔周匝其人捉水洗衆僧手蛇懷敬意觀洗手人

無有厭心衆僧食訖重爲其蛇廣爲說法蛇倍歡喜更增施心將僧維那到本金所殘金六瓶盡用施僧作福已訖便取命終由其福德生忉利天佛告阿難欲知爾時持蛇人者豈異人乎則我身是爾時毒蛇者今舍利弗是我乃往日擔蛇之時爲蛇見責慚愧立誓生謙下心等視一切未曾中退乃至今日時諸比丘阿難之等聞佛所說歡喜奉行

### 差摩現報緣品第三十七

如是我聞一時佛住羅閱祇竹林精舍與尊弟子無央數衆爾時國中有一婆羅門居貧窮困乏於錢穀

勤加不懈衰禍遂甚方宜理盡衣食不供便行問人今此世間作何等行令人現世蒙賴其福有人答言汝不知耶今佛出世福度衆生祐利一切無不得度如來復有四尊弟子摩訶迦葉大目犍連舍利弗阿彌陀等斯四賢士每哀貧之常行福利苦厄衆生汝今若能以信敬心設食供養此諸賢士則可現世稱汝所願特婆羅門聞諸人所說如是事已心懷歡喜往其國中徧行自衒作役其身得少財物擔至其家施設飲食請諸賢聖供養一日剋心精勤望現世報婆羅門婦字曰差摩此言安隱飯僧已訖諸尊弟子勸請

差摩受八關齋受齋已訖各還精舍時瓶沙王值遊  
 林澤還來向城道見一人犯王重罪縛著梁頭豎在  
 道邊見王悲哀求索少食王情慇傷卽可當與正爾  
 別去時王竟日忽忘前事復率自念我已先許彼罪  
 人食云何歟忘卽時遣人致食往與舉宮內外無欲  
 往者咸作是說今是夜半道路恐有猛獸惡鬼羅刹  
 禍難衆多寧死於此不能去也爾時國王念彼人苦  
 身心煩惱極憐愍之卽令國中誰能致食至彼人所  
 賞金千兩國中人民無不受慕者於時差摩常聞人說  
 若世有人受持八關齋者衆邪惡鬼毒獸之類一切

惡災無能傷害差摩聞之便興此心我家貧窮加復  
 受齋今王所慕欲爲我耳我今當往受其慕直思惟  
 已定往應王慕爾時國王又語差摩爲吾擔食至彼  
 人所若達來還吾定當與汝金千兩差摩卽時如勅  
 擔往至心持齋無有缺失順道而行出城漸遠逢一  
 羅刹名曰藍婆彼鬼是時生五百子初生已竟極懷  
 飢渴見差摩來望以爲食然復差摩持齋無缺羅刹  
 見之逆懷怖畏飢餓所逼現身從乞所擔之食持少  
 施我差摩不逆以少與之所施雖少鬼神力故而用  
 養滿於時羅刹問差摩言汝字何等女人答言我字

差摩羅刹歡喜語差摩言今我分身而得安隱由卿活命益我不少我旣蒙活復聞好字我所住處有一金金持以報卿來時念取又復問言汝欲何至差摩答言欲持此食往與彼人藍婆又言我有女妹在前住止字阿藍婆卿若見之吾問訊云我分身生五百子身體安隱具膳我情令知消息差摩如言順道而至見阿藍婆卽出問訊說其藍婆情事委曲生五百子皆悉安隱時阿藍婆聞之歡喜問婦人曰今汝字何女人答我字差摩羅刹聞之亦用歡悅我姊分身復得安隱汝字復好何其善也今此住處有一金

金我用賜卿來時念取又問之曰汝欲何至差摩答言爲王擔食至彼人所阿藍婆曰我有一弟字分那奇住在前路爲吾問訊因詹姊意卽復共辭順道而進到前如意見分那奇爲其二姊具說意狀云彼大姊生五百子身輕安隱無有不祥時分那奇聞其二姊平安消息用心歡喜復問差摩汝字何等婦人答曰我字差摩其鬼答言汝字安隱復得傳我姊平安消息倍何快耶卽語差摩我此住處有金一金以用遺卿來時念取辭別已竟引路而去憶識故處至彼人所與食已訖還來本處取金三金持至其家復於

西漢書卷一  
西漢書卷一

王家得賞金千兩其家於是拔貧卽富國中庶民見  
家內財寶饒多各各慕及樂爲營從來至其家承給  
使令王聞是人福德如是卽召至宮拜爲大臣旣蒙  
王祿其家又富信心誠篤廣殖福業請佛及僧施設  
大檀佛與徒衆悉受其請飲食已訖佛爲說法心意  
開解成須陀洹時諸會者阿難之等聞佛所說歡喜  
奉行

### 賢愚因緣經卷第七

丹陽居士賀學禮施貲刻此  
賢愚因緣經卷第七 計字乙萬九百七十五  
箇該銀五兩七錢乙分  
利溪釋慧慈對金陵傳文貞書濟縣徐繼世刻  
勇悟丁未孟夏月徑山寂照庵識

### 賢愚因緣經卷第八

元魏沙門慧覺譯

### 蓋事因緣品第三十八

如是我聞一時佛在羅閱祇竹林精舍慧命阿難竹  
林中坐心自思惟如來出世甚奇甚特今諸弟子蒙  
佛恩澤於四供養無所乏少各獲安隱得盡苦際一  
切世間諸王臣民亦得大利遭值三寶人民安樂皆  
悉思惟世尊威力所致作是念已從坐處起來詣佛  
所爾時世尊爲四部衆廣說妙法慧命阿難前整衣  
服偏袒右肩右膝著地長跪合掌向佛自說林中所

80 1 2 3 4 5 6 7 8 9

1 2 3 4 5 6 7 8 9

1 2 3 4 5 6 7 8 9

念佛告阿難如汝所言如來出世實復奇特令一切衆生皆獲利益復次阿難如來正覺非但今日祐利衆生過去世時亦復利益阿難白佛不審世尊過去世中饒益衆生其事云何佛告阿難過去久遠阿僧祇劫此間浮提有四河水二大國王一名曰婆羅提婆此言梵天獨據三河人民熾盛然復薄弱一王名曰罰闍建提此言金剛聚唯得一河人民亦少然其國人悉皆勇健時金剛聚處于正殿獨坐思惟如我今者兵衆勇悍而所獲水少彼國憚弱獨霸三河今當遣使和索一河若與我者共爲親厚國有好物更相貢贈若

有艱難共相赴救若其不得便當力逼而奪取之作是念已召諸大臣共議此事諸臣或言今正是時卽遣驛使至梵天國具以王意宣示梵王梵王聞此復自思惟我國豐實人衆亦多又此國界父王所有轉用授我至於力諍我不下彼作是念已報彼使言今此國土非我所得乃是父王轉用見授如我今者力不減汝汝欲力決我不相畏使還本國具以聞王王卽合軍攻梵天國共戰一交梵天軍壞乘背追蹤逕至城邊衆人怖縮更不敢出諸臣相將悉共集會諸梵王所咸皆同心白大王言他國兵強我國憚弱惜

一河水今致此敗如是不久懼恐失國唯願開意以一河水與之共爲親厚足得安全王心便迴可衆臣意卽時遣使至彼軍中白其王言我曹比國用作惡爲所索河水今以相與我當以女爲汝夫人國有異物更相貢贈急難危險其相赴救時金剛聚從其來意卽迎其女拜爲夫人各其和解迴軍還國經於數時其王夫人便覺有胎懷妊之後恒有自然七寶大蓋當在身上坐臥行立終不遠離至滿十月生一男兒身紫金色頭髮緝青光相炳著世之少雙兒以出胎蓋在其上召諸相師令相此兒相師披看舉手唱

言善哉善哉異口同音白大王言今觀太子德力無比人相具足世之希有王及羣臣喜不自勝卽告相師爲其立字爾時國法依於二事而爲作字一者瑞應二者星宿相師白王今此太子入胎已來有何等瑞王答之曰有七寶蓋恒在其上便爲作字字刹羅伽利此言蓋事以衆妙供隨時承奉年至成人父便命終葬送畢竟小王臣民共立蓋事用爲大王治政數年出外遊觀見諸人民耕種勞苦問左右曰我國人衆何以作此種種役使臣答王言國以民爲本民以穀爲命若其不爾民命不存民命不存國則滅矣王便

80

1 2 3 4 5 6 7 8 9 10

言曰若我福相應爲王者令我民衆獲自然穀莫復作此發言已竟一切人民倉篋自滿種種雜穀隨意悉有又經數時復出外遊見其國人採薪汲水春磨作役又問臣言今諸人衆故復勞苦何以爾耶臣白王言蒙王恩澤獲自然穀臣生食事須成熟是以庶民辦作食調王復言曰若我福德應爲王者令吾國內一切人民若欲食時有自然食恒在其前發言已訖合境皆獲自然之食又復經時更出遊觀見人忽忽各執所務紡織裁縫辦具衣調王問臣言此諸人等何以故爾辛苦執作臣白王言蒙大王恩獲自

然食今者作役辦具衣裳王復言曰若我福德應爲王者使吾國內一切樹木出自然永適發此語國中諸樹皆出妙衣極爲細軟青黃赤白隨人所好又經數時王復出遊見於人民各各競共作諸樂器王復問臣我國人民何以故爾勞煩執作臣白王言此諸人等蒙大王恩衣食自然各獲安隱事須妓樂用自娛樂是以今者治妓樂器王便言曰若我有福應爲王者令我國中一切樹上皆有種種樂器鼓貝琴瑟琵琶箏篌一切所須稱意悉有又經數時諸王臣民悉來拜賀值王食時時王卽請留與飲食爾時諸臣

得王飲食百味具足咸共白王臣等家食其味薄少  
今得王食美味非凡王告之曰卿等臣民若欲常得  
如我食者用吾食時食者皆得如是之食卽勅司官  
吾食時到恒鳴大鼓令諸人民悉得聞知用我時食  
當得百味上妙之供從是已後食便鳴鼓一切人民  
承音念食百味上饌自然在前人民優樂不可具陳  
時王梵天遣使來至蓋事王國語蓋事言汝父在時  
我以河水用與汝父汝父已終宜當還我時蓋事王  
報彼使曰我今境土及以河水亦非我力雖從汝得  
然我爲王不勞民物此蓋小事宜停在後須我面與

汝王相見乃當宣備國土之要使還到國一一白王  
王然其意剋日共期期日已滿二王俱進軍衆圍遼  
甚多無數各安大營在河一邊二王乘船河中相見  
時王梵天初見蓋事身色見曜如紫金山頭髮奔奔  
如紺琉璃其目廣長人中難有敬心內發謂是梵天  
到相問訊對坐一處談兩國土論索水事蓋事報曰  
我國人民所欲自然亦無貲輸王役之勞所言未訖  
食時已至蓋事王軍鳴鼓欲食時梵天王甚以惶懼  
謂欲牽攝而取殺之怖不自寧起謝已過手足四布  
腹拍前地蓋事自起曉令還坐復語之曰大王何以

80 1 2 3 4 5 6 7 8 9 90 1 2 3 4 5 6 7 8 9

100

恐怖如是我軍食時恒自鳴鼓所以爾者是我食時用我時食皆獲百味上饌之供時王梵天復起合掌白蓋事曰唯願大王普見臨覆我及國人悉願降附令諸庶民悉蒙恩澤於是蓋事典闇浮提一切人民盡獲安樂登位之後處於正殿羣僚百官宿衛侍立日初出時有金輪寶從東方來王遙見之卽下御座右膝著地向於輪所以手三招輪已來至千幅具足光色炳著王告之曰若我應作轉輪王者如法住處汝便住中於是輪寶當在王前虛空中住其輪去地七多羅樹象寶神珠玉女典兵典藏等寶次第來至

時蓋事王七寶具足典四天下一切衆生蒙王恩德所欲自恣王悉教令修行十善壽終之後皆得生天佛告阿難爾時刹羅伽利王者豈異人乎我身是也爾時父王罰闍建提今現我父淨飯王是爾時母者今現我母摩訶摩耶是我因往昔慈愍衆生恒以財法而攝取之從是因緣自致成佛三界獨尊無與等者以此義故一切衆生皆應修習大慈潤益爾時阿難復白佛言不審世尊過去世中刹羅伽梨轉輪聖王以何因緣獲如是等無量功德初入母胎寶蓋隨覆佛告阿難乃往過去久遠無量阿僧祇劫此闍浮

提波羅柰國仙人山中有辟支佛恒於山中止住時  
辟支佛患身不調往問藥師藥師語曰汝有風病當  
須服乳時彼國中有一薩薄名曰阿利那蜜羅此言聖友

時辟支佛往告其家陳病所由從其乞乳薩薄歡喜  
便請供養日給其乳經於三月三月已竟身病得瘥  
感其善意欲使主人獲大利益踊在空中坐臥行立  
身出水火或現大身滿虛空中又復現小入秋毫裏  
如是種種現十八變於是聖友極懷歡喜復從空下  
重受其供經於數時乃入涅槃薩薄悲悼追念無量  
耶旬其身收取舍利盛以寶瓶用起鑰婆香華妓樂

種種妙物持用供養所捉大蓋以置其上盡其形壽  
供養此塔由其供養一辟支佛四事供養因此福報  
無量世中或生天上或處人中尊豪挺特世之少雙  
又告阿難一切衆生在家出家皆應修福生生之中  
獲如是利爾特阿難及諸會衆聞佛所說歡喜奉行  
大施抒海緣品第三十九

如是我聞一時佛在羅閱祇耆闍崛山中與尊弟子  
千二百五十人俱爾時世尊念須侍者諸尊弟子憍  
陳如等各共觀察知佛所念時憍陳如從座而起偏  
袒右肩合掌長跪白佛貪得侍近捉衣持鉢唯願垂

愍賜教聽許佛告之曰汝年老邁自須給侍何忍使汝復見供事時橋陳如知佛不聽禮已還坐摩訶迦葉舍利弗目犍連及諸弟子五百人等次第白佛皆求給侍佛皆不聽時阿那律試觀佛意見佛志趣心存阿難如日在東照于舍宅光從東牖直至西壁世尊志意亦復如是諸大弟子皆亦觀知時舍利弗及目犍連從坐處起到阿難前語阿難言世尊志意欲得於仁以爲侍者仁有善利獨蒙稱可宜速往白求爲佛侍時賢者阿難見諸上座來到其前又聞其語尋起合掌白上座言世尊德重智慧深遠以我常近

親侍奉事懼招罪尤自遺殃患舍利弗等復語之言今觀世尊專注致意欲得於仁以爲侍者如日初出照于室宅光從東牖直照西壁世尊注心亦復如是又復世尊究人情能知仁堪任是以畱意宜時速白求爲侍者賢者阿難重得是語思惟是事靡知所如復更合掌白諸上座若令世尊賜我三願我乃堪任爲佛侍者何謂爲三世尊故衣勿與我著世尊殘食莫令我噉時節進現隨我裁量得此三願乃能侍佛舍利弗等聞是語已具以其事往白世尊佛聞此已告舍利弗諸弟子等阿難所以求索不著我故承者

阿難長慮恐諸弟子懷嫉妬者而生此心國王臣民  
諸檀越輩施佛貴價細輒之衣阿難貪此故求給事  
復索不歟我殘食者慮諸弟子復生此心如來鉢中  
所食之餘甘美百味世無此食阿難嗜故而來側近  
阿難所以索自裁量特節進現者慮諸弟子及外道  
衆來求進現有所難問不知時節儻相惱觸又爲侍  
者當候時節飲食所宜便身益體一一制度慮過見  
及是以先豫索此三願又復阿難不但今日索自知  
時過去世時奉侍於我善知時宜時舍利弗重白佛  
言不審過去奉事於佛善知時宜其事云何佛告舍

利弗汝欲聞者諦聽著心當爲汝說唯然世尊諾當  
善聽佛告舍利弗乃往過去無數無量阿僧祇劫有  
大國王領閻浮提八萬四千小國八十億聚落王所  
住城名婆樓施舍於是城中有一婆羅門號尼拘樓  
陀聰明博達天才殊邈王甚宗戴師而事之八萬四  
千諸小國王悉遙敬慕瞻仰所在四遠貢獻遣使諮  
承略而言之如奉大王於是婆羅門富敵王家但無  
子息可以紹繼出入坐臥每懷此愁不知何方可以  
得子卽禱祀梵天天帝四王摩醯跋羅及餘諸天日  
月星宿山河樹神種種禱祀無所不偏剋誠積報經

十二年其大夫人便覺有身聰明女人能得知此自知所懷必是男兒卽以情事白婆羅門婆羅門歡喜倍增怡躍卽勑家內夫人婦女悉共擁護夫人進止飲食牀薦極令細軟調適稱給莫違其意十月已滿便生男兒身紫金色頭髮绀青端正超異人相難有婆羅門見喜不自勝卽召相師來共相之相師披觀歎未曾有此兒相好福德弘廣天下所瞻如子賴母其父歡喜勅爲立子天竺作字依於二種或依星宿或依變異相師便問懷妊以來有何變異其父答言此兒之母素來忌惡少於慈順不修慈慧自懷妊來

心性改異矜憐苦厄如母愛子志好布施無有貪惜相師聞之歡喜而言此是兒志故使然也當爲立字號摩訶闍迦<sub>大施</sub>此言梵其兒漸大父甚愛念別爲作宮立三時嚴冬溫夏涼春秋居中安諸妓侍以娛樂之其兒聰明好樂學問誦持俗典十八部書文旣通利并善其義學諸技術靡所不通其後大施白其父言久在深宮思欲出遊父聞此語卽勑臣吏我子大施欲出遊行掃灑街陌除諸不淨暨諸幢旛散華燒香莊嚴道路極令淨潔施設辦已大施於是乘大白象七寶校飾椎鍾鳴鼓作倡妓樂千乘萬騎導從前後

行大御道往詣城門於時國中人民之類於樓閣上  
夾道兩邊競共觀看無有厭足皆各言曰甚奇甚妙  
覩其威相猶如梵天轉復前行見諸乞兒著弊壞衣  
執持破器卑言求哀匱我少少大施見之而問之曰  
汝等何以辛苦乃爾或有答言我無父母兄弟妻子  
貧窮孤苦無所恃怙或有答言我有長病不能作役  
自活無路或有答言我之不遇數遭破亡債負盈集  
身口所切無方自濟是以行乞以繼餘命大施聞已  
酸歎而去次復前行見諸屠兒剝剝畜生稍割稱賣  
大施見問咄作何等各答言曰祖父已來屠殺爲業

若捨此事無以自濟大施歎息捨之而去次見耕者  
以犁墾地蟲從土出蝦蟆拾吞復有蛇來吞食蝦蟆  
孔雀飛來啄食其蛇大施問之此作何等答言墾地  
於中下種後當得穀以自供養并復當得以輸王家  
大施聞已深歎而去次復前行見諸獵者張網設罝  
捕諸禽獸見諸禽獸墮罝中自挽自頓不能得脫  
悲鳴相喚各懷怖懼大施見之何以作此各共答言  
我等唯仰獵殺爲業若不爲此存活無路聞其語已  
酸傷而去次復前行見捕魚師張設羅網所得甚多  
積著陸地趣能動搖復問其故咄何以爾各前答言

祖父已來無餘生業唯仰捕魚賣供衣食大施見已甚懷愍悼而自思惟是諸衆生皆由貧窮之衣食故爲此惡業殺害衆生歡喜極意壽終之後當歸三塗從冥入冥何其怪哉作是念已迴駕還宮思憶是事愁憂不樂往見其父求索一願父語大施隨汝所求終不相違卽自說言先日出遊覩彼人民以求衣食勞形役思殺害欺誰具諸惡業意甚矜憐思欲拯給唯願垂恩施我大藏聽自恣施濟衆所乏父告之曰我聚財寶盡爲汝故汝意欲爾奈何相違兒得父敎中勸宣下一切人民摩訶闍迦樊欲大檀施有所須

者皆悉來取唱令已訖沙門婆羅門貧窮負債孤苦疾病諸城道路前後而去諸人民輩有從百里二三百千里來者復從三千五萬里來者皆強弱相扶四方雲集一切給與滿其所願須衣與衣須食給食金銀七寶車馬輦輦園田六畜稱意而與如是布施經數時中諸藏之物三分已二時典藏吏往白其父摩訶闍迦樊自布施來藏物三分已施其二諸王信使當有往返願熟思惟後勿見責父聞吏語自思惟言吾愛此子不能拒逆寧復空藏何能中斷如是布施復經數時用殘藏物三分復二吏復更白前所

殘物三分之中已更用二諸王信使事須報遺今藏垂空願更重思時婆羅門而語吏言吾愛此子愛心隆厚未曾違失而折其意汝可方便假託因緣來求物時乍稱不在且令餘殘延引日月吏得語已卽閉藏戶小復他行乞兒來集至大施所大施將來詣吏求物其吏不在比行推覓經歷時節因乃得之雖復得物不稱時要大施自念今此小吏自力何敢不承受我將是人意故使爾耳又人子之法不宜空竭父母之藏令其盡也今此藏中所殘無幾作是念已我嘗云何多得財寶用滿我意濟給羣生卽問諸人今

此世間作何事業可得多財用之難盡或有人言多種五穀修治園圃可得多財或有人言多養六畜隨時蕃息可得多財或有人言不避劇難遠出行賈最得多財或有人言唯有入海採求珍寶最得多財大施聞此而自言曰耕種養畜遠出行賈旣非我宜得利無幾唯有入海此計可從我當力勵求辦此事作是念已往白父母今欲入海求多珍寶還用施給濟民所乏唯願見聽得遂所志父母聞語驚而問言世人入海窮貧無計分棄身命無所顧戀汝有何事復欲習此若欲布施我家所有一切衆物及藏中殘盡

80 1 2 3 4 5 6 7 8 9

1 2 3 4 5 6 7 8 9

1 2 3 4 5 6 7 8 9

令汝用莫入大海又復海中衆難甚多水浪迴波摩  
竭大魚惡龍羅刹水色之山如是衆喰難可經過汝  
有何急投身此難我等命存終不相聽宜息汝意勿  
多紛紜大施聞此願不從心甚懷悒戚而自心念我  
今所願欲辦大事設復貪身事何由成以身布地伏  
父母前而自言曰若必顧畱邁我志願伏身此地終  
不復起父母聞此心懷灼熱與諸內宮前諫諭曰海  
道遼遠嶮難事多往者甚衆來還者渺念我求子禱  
祀諸天精誠懇惻靡所不徧經十二年因乃從願適  
汝長大欲得捨我念棄此志還起飲食從一日二日

至于六日如是種種諫諭求曉其言如初執志不迴  
父母心懼自共議言此兒前後欲有所爲要令成辦  
未曾中退就令人海猶望還期今必拒遯到其七日  
交見其禍爲之奈何宜當聽去轉復在後言議已決  
俱來兒邊各捉一手而語兒言聽隨汝意起還就食  
大施聞此卽起就飯飯食已訖卽起出外廣行宣令  
告語衆人我今躬欲入海採寶誰欲往者可共俱進  
我爲薩薄自辦行具於時國中有五百人聞是令已  
僉然應命卽辦所須剋定發日日到裝駕辭別趣道  
王與羣臣并其父母諸王太子臣民之類數千萬人

送到路次各贈妙寶供道所須啼哭斷絕於是別去轉行數日止宿曠野值遇羣賊來欲伺盜菩薩憐愍卽以所齋盡用勺與轉前到城城名放鉢城中有婆羅門名迦毗梨於時大施往到其所欲從貸索三千兩金時婆羅門有一妙女身紫金色頭髮紺青端正絕世更無儔類八萬四千諸小國王皆爲太子求悉不許是時大施到其門中問迦毗梨欲共相見其女在內聞外語聲歡喜驚起語父母言在外語者斯是我婿時迦毗梨卽出相見覩其色狀知必非凡聞其須金一切許給又復左手提金澡罐右手捉女語大

施言今我此女容貌妙殊異諸王遣使各爲子求今覩  
薩薄端正相似請以此女用相奉侍大施答言我今  
方當涉難入海焉知能得安全還不預受君女此非  
所以迦毗梨言若令吉還當爲我受是時大施卽許  
可之時迦毗梨歡喜便與三千兩金及餘所須於是  
共別轉前到海勑語賈人牢治其船令有七重候風  
以至推著海中以七張大索繫於岸邊便搖鈴唱令  
告衆賈人汝等皆聽海中之難黑風羅刹水浪洞瀆  
惡龍毒氣水色之山摩竭大魚衆難甚多百伴入海  
時一安還誰欲退者可於此住索斷之後欲悔無及

80 1 2 3 4 5 6 7 8 9

10

11

12

若能堅心不顧身命分捨父母兄弟妻子際遇安隱  
得七寶還者子孫七世食用不盡作是念已便斷一  
索日日如是七日復唱令已斷第七索望風舉帆船  
疾如箭普與衆賈到於寶所大施多聞明識諸寶輕  
重貴賤色貌好醜示諸賈客如是色寶致之不重價  
貴可取如是輩寶致重價賤各共莫取又復約勅取  
寶多少當令得中多則船重重則沉沒少雖船輕不  
補勞苦誠語已訖各勤採拾積著船上寶足裝嚴便  
欲求還於時大施不欲上船諸人悉集問其意故大  
施答言我欲前進至龍王宮求如意珠盡我身命不

得不還衆賈聞此愁慘無聊各共白言我曹之等憑  
賴薩薄捐棄所重冒嶮至此冀望相因全濟還家今  
者云何欲見棄捨大施答言我當爲汝自誓求願令  
汝曹等安隱還國諸賈人聞心怖乃安大施導師手  
執香爐向於四方而自立誓我不憚勞涉海求珍用  
濟羣生飢乏之困合集此德用求佛道若我至誠所  
願當就令此衆賈及船珍寶不逢惡難安全還國作  
誓已訖衆賈前抱導師手足涕泣愴恨辭別還國斷  
索舉帆還閭浮提皆蒙安隱得出大海與衆別後前  
入於水水可齊膝行經七日轉復前行其水漸深可

齊於岐復經七日如是前進七日齊腰七日齊項七  
日恒浮到一山邊兩手捉木刺山而上經乎七日乃  
徹山頂於彼山上平行七日復還下山七日徹下到  
於水邊水中皆有金色蓮華有諸毒蛇其毒極盛悉  
以其身纏蓮華根菩薩見此卽自端坐繫心攝念入  
慈三昧念諸毒蛇本生之時皆由瞋恚嫉妬倍盛故  
生此中受斯惡形極以慈心矜憐悲念慈心已滿彼  
諸毒蛇皆自除歇大施卽起躡華而行復經七日乃  
得度蛇轉復前行見諸羅刹聞人香臭皆來求覓大  
施已見攝心慈觀諸羅刹輩敬心自生軟語來問欲

何所至大施具答欲求如意寶珠羅刹歡喜而自念  
言此福德人去於龍宮其道猶遠云何使此經涉辛  
苦我當接過於諸嶮難卽時接去度四百由旬乃還  
放地於是大施轉自前行見一銀城白淨皎然知是  
龍城歡喜往趣見其城外有七重塹溝諸塹中皆有  
毒蛇其毒猛盛視之可惡大施導師念諸毒蛇皆由  
前身怒害多盛故受如斯可惡之形念慈哀愍如視  
赤子慈心已滿毒蛇悉除卽起踏上行詣龍城見有  
二龍以身繞城交頭門闈見於大施仰頭憇視大施

而過城中有龍坐七寶殿遙見菩薩驚起自念今我  
城外七重塹中有毒蛇餘龍夜又無敢妄越斯是何  
人能來至此卽前迎問作禮恭敬請令就座坐七寶  
牀種種美饌以用供養食已談語問其來意菩薩答  
言間浮提人貧窮辛苦求於財寶供衣食故殺害欺  
誑具造衆惡命終之後墮三惡道意甚憐愍欲救濟  
故涉險遠來見於大王求旃陀摩尼往用救濟積此  
功德誓求佛道若不拒逆唯見給與龍王答言旃陀  
摩尼難得之寶汝故遐儉正來爲此若能開意畱住  
一月受少微供因爲說法旃陀摩尼爾乃可得菩薩

可之龍王日日供設百味作諸妓樂供養菩薩菩薩  
便爲具足分別四念處慧經一月竟辭當還去龍王  
歡喜解髻寶珠以用奉上因而言曰大士慈普悲濟  
難及此志强猛必至佛道我願爲作智慧弟子菩薩  
可之而問之言今汝此珠有何力能卽答之言此珠  
能雨二千由旬一切所須菩薩自念此珠雖快故未  
辦我曠濟大事諸龍大小送到門外重相辭謝於是  
別去轉復前行遙見一城純青琉璃其色清潔復前  
往趣其城外邊亦七重塹諸塹之中亦滿毒蛇菩薩  
見已念此諸蛇瞋妬所致故來此中受此毒形端坐

80 1 2 3 4 5 6 7 8 9

1 2 3 4 5 6 7 8 9

100

1 2 3 4 5 6 7 8 9

10

入慈極加哀念慈心已盛毒皆得除徑蹈其上往趣  
城門亦見二龍以身纏城交頭門闈已見菩薩擎頭  
怒視菩薩尋時思惟慈心慈心已滿其毒復除更復  
低頭菩薩蹈過爾時城中有一龍王坐七寶殿遙見  
菩薩驚起自念計我城外七重蛇塹諸龍夜又無能  
越者此是何人能來至此尋下迎問恭敬作禮請詣  
殿上坐七寶牀辦諸百味盛美飲食竟徐徐談問  
所由菩薩因答故來之意唯欲求乞旃陀摩尼龍王  
白言旃陀摩尼甚爲難得苟欲得者願受我請二月  
住此并見開示菩薩之行龍王供設種種飲食作諸

妓樂而以供養菩薩具足爲其分別四神足事經二  
月已辭當還去龍王卽出髻中寶珠以用奉上因立  
誓大士慈心悲濟羣生其心廣大必至佛道我願  
爲作神足弟子菩薩可言如汝所願又復問此所與  
寶珠力能云何龍卽答言此珠能雨四千由旬一切  
所須菩薩自念此珠轉勝雖復殊妙未稱我意諸龍  
大小送出門外各懷戀恨於是別後轉更前行見一  
金城其色晃晃甚爲妙好菩薩往趣見其城外亦七  
重塹諸塹之中亦滿毒蛇菩薩自念此諸毒蛇亦由  
前身習毒憎妬怒害盛故受此毒形端坐入慈極加

愛念慈心已至毒蛇皆除便前登躡踏上而過到於城門亦見二龍以身纏城交頭門闌已見菩薩仰頭憫視菩薩如法入于慈定龍毒得除低頭而視卽前躡上度入城中彼時城中亦有龍王處於寶殿遙見菩薩愕然自念我此城外有七重塹滿中毒蛇餘龍夜又無能越者今此何人能來至此心極奇怪尋下迎問致敬爲禮請令上殿施七寶牀讓之令坐坐已具食種種美味食已徐問所以來意菩薩答言閻浮提人薄德窮苦勞身役思殺害欺誑爲衣食故具十不善命終之後復墮三劇苦中意甚愍傷思欲救濟

承海龍王有如意珠故涉遐嶮唯望得此龍王答言如意寶珠此難得物大士故來望當相與若欲得者四月留住受我微供并見敎誨菩薩尋可龍王歡喜日日施設百味上美躬自斟酌奉進甘食亦復勑作種種妓樂菩薩恒爲分別諸法名字本末廣宣其義龍王敬慕專意聽受朝夕問訊不失時節隨時所須龍自裁量諸龍夜又來欲求現可進可退自立限度奉事四月善知時宜四月已竟菩薩辭去爾時其龍卽解髻中如意之珠用奉上之因立誓願大士弘誓慈心曠濟悲彼羣生不憚勤勞必能成佛拔濟塗炭

願作侍者總持弟子菩薩許之又復問言所可施珠  
力能何如龍王答言此珠能雨八千由旬十寶所須  
菩薩歡喜而自念言閻浮提地七千由旬此珠之德  
副我所望前後所得凡有三珠繫在衣角卽起出城  
諸龍大小送到城外各懷悲戀遂共別去菩薩到前  
捉珠求願若今實是旃陀摩尼當令我身能飛虛空  
求願已訖卽舉其身徑能飛翔出于海外已渡海難  
小眠休息是時海中有諸龍輩自共議言我曹海中  
唯此三珠其德甚大難有般比此人皆能索得持去  
可惜此寶當還攝取言議已竟密解持去菩薩眼覺

看珠不在卽自思惟此中無人必是海龍持我寶去  
我爲此珠經涉遐嶮今垂還國滿我所願雖取我珠  
吾終不放會當盡力行此海水誓心剋志單命於此  
若不得珠終不空歸思惟已定卽行海邊得一龜甲  
兩手捉持方欲抒海海神知意來問之曰海水深廣  
三百三十六萬里正使一切人民之類盡來共抒不  
能使減況汝一身而欲辦此菩薩答言若人至心欲  
有所作事無不辦我得此寶當用饒益一切羣生以  
此功德用求佛道我心不懈何以不能是時首陀會  
天遙見菩薩一身一意獨執勤勞欲用充濟安樂一

切我曹云何不往佐助展轉相語來至其所菩薩下器一切諸天盡以天衣同淹水中菩薩出器諸天舉衣棄著餘處一反抒海減四十里二反抒之減八千里三反抒之減百二十里其龍惶怖來到其所語言止止更莫抒海菩薩尋休龍來問言汝求此寶用作何等菩薩答言欲用給濟一切衆生龍復問言如汝言者我曹海中衆生甚多何以不與必欲得去菩薩答言海中之類亦是衆生然無劇苦如閻浮提人民之類爲錢財故殺害欺誑作十不善死墮三塗我以人類解於法化故來索寶先克所乏後以十善而勸

誨之龍聞其語出珠還之爾時海神見其精進強力所作卽作誓言汝今如是精進不休必成佛道我願爲作精進弟子菩薩得珠復更飛去到便先問入海同伴賈客卽下在地同伴見之驚喜無量皆共歎言甚奇甚特轉復前行到放鉢城迦毗梨婆羅門聞於菩薩海中吉還歡喜踊躍出迎問訊并請同伴爲設客會辦具種種餚饍飲食訖談叙行路恤耗是時菩薩持其寶珠指歷其家婆羅門家內諸藏悉滿會者覩此歎未曾有時迦毗梨莊嚴其女若干種寶校飾其身躬手自捉金寶澡罐先洗自手後牽女臂授

與菩薩菩薩爲受迦毗梨歡喜嚴五百妓女擇取才能工爲妓者具五百白象衆寶莊校極令奇異用送其女菩薩勅伴駕乘進路城中大小送到道次作衆妓樂導從還國大施父母自與兒別憂結迷憤啼哭過哀其目俱冥盲無所見兒還到國禮拜問訊父母聞聲以手摩潤爾時審知大施還國悲喜交代窮責其子汝實無狀捨我入海困苦我曹微命趣存汝大海中得何等物菩薩出珠以授父母父母手捉而自言曰今我藏中如斯石比亦不少也何用辛苦方乃得此菩薩取珠指父母眼目歛明淨如風除雲旣還

得視心遂欣豫感此珠德歎言甚奇汝雖辛苦功不唐捐菩薩復捉其珠而從求願若是旃陀摩尼者使我父母下自然有七寶奇妙珍異牀座上有嚴淨七寶大蓋言訖尋成一切皆喜菩薩復更捉珠求願令我父母及王臣民一切諸藏皆悉盈滿卽以其珠四向歷訖如語悉滿莫不驚喜卽時遣人乘八千里象告闇浮提一切人民摩訶闍迦焚海中吉還得如意珠其德殊異卻後七日當令其珠雨於一切珍寶不食隨人所須自恣而取皆各齋戒儲俟以待告下偏已七日頭到大施菩薩沐浴其身著新淨衣至平坦

地卽持其珠著高幢頭手執香爐四方求願閻浮提人貧窮辛苦欲得濟給令無有乏若當實是旃陀摩尼便當次第雨衆所須求願已訖四方陰雨雲卽時風起吹諸不淨瑕穢糞掃皆悉除去次雨微水以淹塵土次雨飲食百味上美次雨五穀次雨衣服次雨七寶種種奇珍閻浮提內衆寶積滿人民之類自恣而取上妙衣食盈溢有餘視諸珍寶猶如瓦石爾時菩薩觀民克足卽遣臣吏四遠告下閻浮提內咸使聞知汝等羣民先由窮乏求於衣食及諸財寶更相欺誑殺害極意見利忘義不推罪福命終皆墮三塗

之中從冥入冥受罪多劫常相悲憐無由相濟故忘形苦涉嶮入海得此寶珠來用相救汝等旣已更無乏短念自剋勵勤修十善攝身口意慈仁孝順精進御意勿懷放逸種種方便廣勅奉善因作文書告諸王臣瞻其法誨咸令聞知更相勸督勿妄爲非爾時一切閻浮提內旣蒙大恩慈澤霑潤各思何方仰酬至德又蒙優教勅使修善咸皆慕義專習慈敬制身口意不妄犯非命終之後皆得生天如是舍利弗欲知爾時父婆羅門尼拘盧陀者今現我父淨飯王是爾時母者今現我母摩訶摩耶是時大施者今我身

80 1 2 3 4 5 6 7 8 9 10 1 2 3 4 5 6 7 8 9 10

是銀城中龍者今舍利弗是瑠璃城中龍者目犍連  
是金城中龍者今阿難是時海神者今離越是阿難  
爲龍王時奉事於我善知時宜乃至今日素自知時  
阿難欲得此三願者隨從其意阿難聞此歡喜踊躍  
從座處起長跪白佛當盡形壽爲佛侍者時諸會者  
聞佛所說感念大恩專心剋勵思惟四諦諸法出要  
有得須陀洹斯陀含阿那含阿羅漢者有種辟支佛  
善因緣者有發無上正真道意者有得住不退地者  
咸共歡喜頂戴奉行

賈愚因緣經卷第八

音釋

悍侯肝切憚泥耕切勞葵營切宣咨邪切  
也有力也憚困也勞獨也宣冤網也抒丈尸

丹陽居士賀學禮施費刻此  
賢愚因緣經卷第八 計字九千五百六十四  
箇該銀四兩九錢七分  
魏唐釋大因對金陵傳文貞書江寧湯尚愚刻  
萬曆丁未仲夏月徑山寂照庵識

80

1 2 3 4 5 6 7 8 9 10

賢愚因緣經卷第九  
元魏沙門慧覺譯  
阿難總持緣品第四十  
如是我聞一時佛在舍衛國祇樹給孤獨園爾時諸比丘咸皆生疑賢者阿難本造何行獲此總持聞佛所說一言不失俱往佛所而白佛言賢者阿難本興何福而得如是無量總持唯願世尊當見開示佛告諸比丘諦聽著心斯之總持皆由福德乃往過去阿僧祇劫爾時有一比丘畜一沙彌恒以嚴勸教令誦經日日課程其經足者便以歡喜若其不足苦切責

80 1 2 3 4 5 6 7 8 9

10

11

12 3 4 5 6 7 8 9

10

之於是沙彌常懷憂惱誦經雖得食復不周若行乞食疾得食時誦經便足乞食若遲誦則不克若經不足當被切責心懷愁悶啼哭而行時有長者見其啼哭前呼問之何以憂惱沙彌答曰長者當知我師嚴難勑我誦經日日課限若其足者卽以歡喜若其不克苦切見責我行乞食若疾得者誦經卽足若乞遲得誦便不克若不得經便被切責以是事故我用愁耳於時長者卽語沙彌從今已往常詣我家當供養食令汝不憂食已專心勤加誦經爾時沙彌聞是語卽得專心勤加誦學課限不減日日常度師徒於

是俱用歡喜佛告比丘爾時師者定光佛是時沙彌者今我身是時大長者供養食者今阿難是乃由過去造是行故今得總持無有忘失爾時諸比丘聞是說已歡喜信受頂戴奉行

優婆斯兄所殺緣品第四十一

如是我聞一時佛在舍衛國祇樹給孤獨園爾時羅閱祇國有賈客兄弟二人共住一處兄求長者女欲以爲婦其女年小未任出適於時其兄卽與衆賈遠至他國經歷年歲滯不時還女年向大任可嫁處而語其弟卿兄遠行沒彼不還汝今宜可納取我女其

80 1 2 3 4 5 6 7 8 9

100 1 2 3 4 5 6 7 8 9

100 1 2 3 4 5 6 7 8 9

100

弟答言何有是事我兄存在不敢有違爾時長者數  
數陳說其弟意堅未曾迴轉長者不已詐作遠書託  
諸賈客說兄死亡弟聞兄死心乃愕然長者復往而  
告之曰卿兄已死女當云何卿若不取當思餘計弟  
被逼急卽妻其女經歷數時女便懷妊兄後便乃從  
他國還於時其弟聞兄還國心懷愁懼遂至舍衛發  
跡之後諸親友輩按其婦腹墮其胎兒如是展轉到  
於佛前慚愧所逼求索出家佛知可度卽時聽許蒙  
佛聽已便成沙門名優婆斯奉持律行精勤不懈應  
時便得阿羅漢道六通清徹衆智具足時兄到家見

弟已取其婦嫉心內忿往追欲殺求索推問云至舍  
衛毒恚煩心卽出重募誰能取我彼弟頭者當與重  
賞金五百兩時有一人來應其募我能往取其頭兄  
卽出金用募其人相將俱進至舍衛國到彼見弟坐  
禪思惟於時彼人欵生慈心而作是念我當云何殺  
此比丘吾設不殺當奪我金引弓欲射當挽弓時向  
彼比丘至於放矢乃中其兄其兄懷恚憤懣而死後  
更受身作毒蛇形生彼道人戶樞之中毒心未歇規  
當害之戶數開閉撤身而死既死之後未能改操遂  
願更作小形毒蟲依彼道人屋間而住伺其道人端

80 1 2 3 4 5 6 7 8 9 10

100 1 2 3 4 5 6 7 8 9 100

坐之時從屋間下墮其頂上惡毒猛熾卽殺比丘時舍利弗見斯事已往至佛所而白佛言彼死比丘本作何緣今現得道被毒而死唯願世尊當見開示佛告舍利弗善聽善念吾當爲汝具分別說乃往過去無數世中有辟支佛出現於世處在山林修道以遂其志時有獵師恒捕禽獸施設方計望伺苟得時辟支佛驚其禽獸令其獵師伺捕不得便懷瞋恚懊惱憤結卽以毒箭射辟支佛時辟支佛心愍此人欲令此悔爲現神足所謂飛行履虛屈伸舒戢出沒自在是變現於時獵師見是事已心懷敬仰恐怖自責

歸誠謝過求哀懺悔時辟支佛卽受其懺悔懺悔已竟被毒而死其人命終便墮地獄既出地獄五百世中常被毒死至于今日得羅漢道猶爲毒蟲見蟄斷命由興惡意卽還懺悔而發誓願使我來世遭值聖師所得神足如今是人以是之故今得值我蒙獲道法爾時舍利弗及與衆會聞佛所說歡喜奉行兒誤殺父緣品第四十二

如是我聞一時佛在舍衛國祇樹給孤獨園爾時有一老公早失其婦獨與兒居困無財寶覺世非常念欲出家卽往佛所求索入道時佛憐愍卽聽出家於

時其父便作比丘時兒年小卽爲沙彌恒共其父入村乞食暮還所止時有一村最爲邊遠至彼乞食逼暮當還其父年老行步遲緩其兒恐懼畏諸毒獸急扶其父排之進路執之不固推父倒地應時其父當手而死父死之後獨至佛所諸比丘問沙彌言汝朝與師至村乞食今爲所在沙彌答言我向與師至彼乞食日暮還時師行小遲我恐怖故急推之推之手急撲師著地我師於時卽死道中時諸比丘訶責沙彌汝大惡人殺父殺師卽以白佛佛告之曰此師雖死不以惡意卽問沙彌汝殺師不沙彌答言我實排

之不以惡意而殺父也佛可其語如是沙彌我知汝心無有惡意過去世時亦復如是無有惡意而相殺害時諸比丘聞佛語已卽共白佛不審世尊過去世時斯人父子有何因緣而便相殺佛言諦聽吾當說之過去無量阿僧祇劫時父子二人共住一處時父病極於時睡臥多有蠅蠅數來惱觸父卽令兒遮逐其蠅望得安眠以解疲勞時兒急遮蠅遂數來數來不止兒便瞋恚卽持大杖伺蠅當殺時諸蠅競來父額以杖打之卽殺其父當於爾時亦非惡意比丘當知爾時父者此沙彌是時兒以杖打父額者今彼

80 1 2 3 4 5 6 7 8 9

90 1 2 3 4 5 6 7 8 9

100 1 2 3 4 5 6 7 8 9

死比丘是由於爾時無有惡心以杖打父殺之不以  
惡意今還相報亦非故殺於時沙彌漸漸修學勤加  
不懈遂得羅漢爾時諸比丘聞佛所說心悉信解歡  
喜奉行

須達起精舍緣品第四十三

如是我聞一時佛在王舍城竹園中止爾時舍衛國  
王波斯匿有一大臣名曰須達居家巨富財寶無限  
好喜布施賑濟貧乏及諸孤老時人因行爲其立號  
名給孤獨爾時長者生七男兒年各長大爲其納娶  
次第至六其第七兒端正殊異偏心愛念當爲妻娶

欲得極妙容姿端正有相之女爲兒求之卽語諸婆  
羅門言誰有好女相貌備足當爲我見往求索之諸  
婆羅門便爲推覓展轉行乞到王舍城城中有一大  
臣名曰護彌財富無量信敬三寶時婆羅門到家從  
乞國法施人要令童女持物布施護彌長者時有一  
女威容端正顏色殊妙卽持食出施婆羅門婆羅門  
見心大歡喜我所覓者今日見之卽問女言頗有人  
來求索汝不答言未也問言女子汝父在不其女言  
在婆羅門言語令出外我欲見之與共談語時女入  
內白其父言外有乞人欲得相見父便出外時婆羅

門問訊起居安和善吉舍衛國王有一大臣字曰須達輔相識不答言未見但聞其名報言知不是人於彼舍衛國中第一富貴汝於此間富貴第一須達有兒端正殊妙卓略多奇欲求君女爲可爾不答言可爾值有賈客欲至舍衛時婆羅門作書因之送與須達具陳其事須達歡喜詣王求假爲兒娶婦王卽聽之大載珍寶趣王舍城於其道次賑濟貧乏到王舍城到護彌家爲兒求妻護彌長者歡喜迎逆安置敷具幕宿其舍家內搔搔辦具飲食須達念言今此長者大設供具欲作何等將請國王太子大臣長者居

士婚姻親戚設大會耶思惟所以不能了知而問之言長者今暮躬自執勞經理事務施設供具爲欲請王太子大臣答言不也欲請婚姻親戚會耶答言不也將何所作答言請佛及比丘僧於時須達聞佛僧名懔然毛豎如有所得心情悅豫重問之言云何名佛願解其義長者答言汝不聞乎淨飯王子厥名悉達其生之日天降瑞應三十有二萬神侍衛卽行七步舉手而言天上天下唯我爲尊身黃金色三十二相八十種好應王金輪典四天下見老病死苦不樂在家出家修道六年苦行得一切智盡結成佛降諸

80 1 2 3 4 5 6 7 8 9

100 1 2 3 4 5 6 7 8 9

魔衆十八億萬號曰能仁十力無畏十八不共光明  
照耀三達遐鑒故號佛也須達問言云何名僧護彌  
答言佛成道已梵天勸請轉妙法輪至波羅柰鹿野  
苑中爲拘隣五人轉四真諦漏盡結解便成沙門六  
通具足四意七覺八道悉練上虛空中八萬諸天得  
須陀洹無量天人發無上正真道意次度鬱鞞迦葉  
兄弟千人漏盡意解如其五人次第度舍利弗目連  
徒衆五百亦得應真如是之等神足自在能爲衆生  
作良祐福田故名僧也須達聞說如此妙事歡喜踊  
躍感念信敬企望至曉當往見佛誠欵神應見地明

曉尋明卽往羅閱城門夜三時開初夜中夜後夜是  
謂三時中夜出門見有天祠卽爲禮拜忽忘念佛心  
目還闇便自念言今夜故闇若我往者儻爲惡鬼猛  
獸見害且還入城待曉當往時有親友命終生四天  
見其欲悔便下語之居士莫悔也汝往見佛得利無  
量正使今得百車珍寶不如轉足一步徑趣世尊所  
得利深過踰於彼居士汝去莫悔正使今得百象珍  
寶不如舉足一步往趣世尊利過於彼居士汝去莫  
悔正使今得一闍浮提滿中珍寶不如轉足一步至  
世尊所得利弘多居士汝去莫悔正使今得一四天

下滿中珍寶不如舉足一步至世尊所得盈利踰過於彼百千萬倍須達聞天說如此語益增歡喜敬念世尊聞卽得曉尋路往至到世尊所爾時世尊知須達來出外經行是時須達遙見世尊猶如金山相好威容儼然炳著過踰護彌所說萬倍覩之心悅不知禮法直問世尊不審瞿曇起居何如世尊卽時命令就坐時首陀會天遙見須達雖覩世尊不知禮拜供養之法化爲四人行列而來到世尊所接足作禮胡跪問訊起居輕利右繞三匝却住一向是時須達見其如是乃爲愕然而自念言恭敬之法事應如是

卽起離座如彼禮敬問訊起居右繞三匝却住一向爾時世尊卽爲說法四諦微妙苦空無常聞法歡喜便染聖法成須陀洹譬如淨潔白疋易染爲色長跪合掌問世尊言舍衛城中如我伴輩聞法易染更有如我比不佛告須達更無有二如卿之者舍衛城中人多信邪難染聖教須達白佛唯願如來垂神降屈臨覆舍衛使中衆生除邪就正世尊告曰出家之人法與俗別住止處所應當有異彼無精舍云何得去須達白佛言弟子能起願見聽許世尊默然須達辭往爲兒娶婦竟辭佛還家因白佛言還到本國當立

精舍不知模法唯願世尊使一弟子共往勑示世尊  
思惟舍衛城中婆羅門衆信邪倒見餘人往者必不  
能辦唯舍利弗是婆羅門種少小聰明神足兼備去  
必有益卽便命之共須達往須達問言世尊足行日  
能幾里舍利弗言日半由旬如轉輪聖王足行之法  
世尊亦爾是時須達卽於道次二十里作一客舍計  
校功作出錢雇之安止使人飲食敷具悉皆令足從  
王舍城至舍衛國還來到舍共舍利弗案行諸地何  
處平博中起精舍案行周徧無可意處唯王太子祇  
有園其地平正其樹鬱茂不遠不近正得處所時

舍利弗告須達言今此園中宜起精舍若遠作之乞  
食則難近處憒鬧妨廢行道須達歡喜到太子所白  
太子言我今欲爲如來起立精舍太子園好今欲買  
之太子笑言我無所乏此園茂盛當用遊戲逍遙散  
志須達慇懃乃至再三太子貪惜增倍求價謂呼價  
貴當不能買語須達言汝若能以黃金布地令間無  
空者便當相與須達曰諾聽隨其價太子祇言我戲  
語耳須達白言爲太子法不應妄語妄語欺詐云何  
紹繼撫恤人民卽共太子欲往訟了時首陀會天以  
當爲佛起精舍故恐諸大臣偏爲太子卽化作一人

80 1 2 3 4 5 6 7 8 9

經

原傳法華經卷第十一

五

下爲評詳語太子言夫太子法不應妄語已許價決  
 不宜中悔遂斷與須達歡喜便勑使人象負金出  
 八十頃中須臾欲滿殘有少地須達思惟何藏金足  
 不多不少當足滿之祇陀問言嫌貴置之答言不也  
 自念金藏何者可足當補滿之祇陀念言佛必大德  
 乃使斯人輕寶乃爾教齊是止勿更出金園地屬卿  
 樹木屬我我自上佛共立精舍須達歡喜卽然可之  
 卽便歸家當施功作六師聞之往白國王長者須達  
 買祇陀園欲爲瞿曇沙門興立精舍聽我徒衆與共  
 較術沙門得勝便聽起立若其不如不得起也瞿曇

徒衆住王舍城我等徒衆當住於此王召須達而問  
 之言今此六師云卿買祇陀園欲爲瞿曇沙門起立  
 精舍求其沙門弟子較其技術若得勝者得立精舍  
 苟其不如便不得起須達歸家著垢膩衣愁惱不樂  
 時舍利弗明日時到著衣持鉢至須達家見其不樂  
 卽問之曰何故不樂須達答言所立精舍但恐不成  
 是故愁耳舍利弗言有何事故畏不成就答言今諸  
 六師詣王求較尊人得勝聽立精舍若其不如遮不  
 聽起此六師輩出家來久精誠有素所學技術無能  
 及者我今不知尊人技藝能與較不舍利弗言正使

80 1 2 3 4 5 6 7 8 9

1 2 3 4 5 6 7 8 9

80 1 2 3 4 5 6 7 8 9

100 1 2 3 4 5 6 7 8 9

10

此輩六師之衆滿闇浮提數如竹林不能動吾足上一毛欲較何等自恣聽之須達歡喜更著新衣沐浴香湯卽往白王我已問之六師欲較恣隨其意國王是時告諸六師今聽汝等共沙門較時諸六師宣語國人却後七日當於城外寬博之處與沙門較舍衛國中十八億人時彼國法擊鼓會衆若擊銅鼓十二億人集若打銀鼓十四億集若振金鼓一切皆集七日期滿至平博處椎擊金鼓一切都集六師徒衆有三億人是時人民悉爲國王及其六師敷施高座爾時須達爲舍利弗而施高座時舍利弗在一樹下寂

然入定諸根寂默遊諸禪定通達無礙而作是念此會大衆習邪來久懈慢自高草芥羣生當以何德而降伏之思惟是已當以三德卽立誓言若我無數劫中慈孝父母敬尚沙門婆羅門者我初入會一切大衆當爲我禮爾時六師見衆已集而舍利弗獨未來到便白王言瞿曇弟子自知無術僞求較能衆會既集怖畏不來王告須達汝師弟子較時已至宜來談論時須達至舍利弗所長跪白言大德大衆已集願來詣會時舍利弗從禪定起更整衣服以尼師壇著左肩上徐詳而步如師子王往詣大衆是時衆人見

其形容法服有異及諸六師忽然起立如風靡草不覺爲禮時舍利弗便昇須達所敷之座六師衆中有一弟子名勞度差善知幻術於大衆前呪作一樹自然長大蔭覆衆會枝葉鬱茂華果各異衆人咸言此變乃是勞度差作時舍利弗便以神力作旋嵐風吹拔樹根倒著於地碎爲微塵衆人皆言舍利弗勝勞度差便爲不如又復呪作一池其池四面皆以七寶池水之中生種種華衆人咸言是勞度差之所作也時舍利弗化作一大六牙白象其一牙上有七蓮華一一華上有七宝女其象徐詳往詣池邊并舍其水

池卽時滅衆人悉言舍利弗勝勞度差不如復作一山七寶莊嚴泉池樹木華果茂盛衆人咸言此是勞度差作時舍利弗便化作金剛力士以金剛杵透用指之山卽破壞無有遺餘衆會皆言舍利弗勝勞度差不如復作一龍身有十頭於虛空中雨種種寶雷電震地驚動大衆衆人咸言此亦勞度差作時舍利弗便化作一金翅鳥王擘裂噉之衆人皆言舍利弗勝勞度差不如復作一牛身體高大肥壯多力麤腳利角跑地大吼奔突來前時舍利弗化作師子分裂食之衆人言曰舍利弗勝勞度差不如復變其身

作夜又鬼形體長大頭上火然目赤如血四牙長利口目出火驚躍奔赴時舍利弗自化身作毗沙門王夜又恐怖卽欲退走四面火起無有去處唯舍利弗邊涼冷無火卽時屈伏五體投地求哀脫命辱心已生火卽還滅衆咸唱言舍利弗勝勞度差不如時舍利弗身昇虛空現四威儀行住坐臥身土出水身下出火東沒西踊北沒南踊南沒北踊或現大身滿虛空中而復現小或分一身作一百千萬億身還合爲一於虛空中忽然在地履地如水履水如地現是變已還攝神足坐其本座時會大衆見其神

力咸懷歡喜時舍利弗卽爲說法隨其本行宿福因緣各得道迹或得須陀洹斯陀含阿那含阿羅漢者六師徒衆三億弟子於舍利弗所出家學道較技訖已四衆便罷各還所止長者須達共舍利弗往圖精舍須達手自捉繩一頭時舍利弗自捉繩一頭共經精舍時舍利弗欣然含笑須達問言尊人何笑答言汝始於此經地六欲天中宮殿已成卽借道眼須達悉見六欲天中嚴淨宮殿問舍利弗是六欲天何處最樂舍利弗言下三天中色欲染厚上二天中憍逸自恣第四天中少欲知足恒有一生補處菩薩來生

80 1 2 3 4 5 6 7 8 9

10

11

12

13

14

15

16

17

18

19

20

21

22

23

24

25

26

27

28

29

30

31

32

33

34

35

36

37

38

39

40

其中法訓不絕須達言曰我正當生第四天中出言已竟餘宮悉滅唯第四天宮殿湛然復更從繩時舍利弗慘然憂色卽問尊者何故憂色答言汝今見此地中蟻子不耶對曰已見時舍利弗語須達言汝於過去毗婆尸佛亦於此地爲彼世尊起立精舍而此蟻子在此中生尸棄佛時汝爲彼佛亦於是中造立精舍而此蟻子亦在中生毗舍浮佛時汝爲世尊於此地中起立精舍而此蟻子亦在中生拘畱秦佛時亦爲世尊在此地中起立精舍而是蟻子亦於此生迦那舍牟尼佛時汝爲世尊於此地中起立精舍而

此蟻子亦在中生迦葉佛時汝亦爲佛於此地中起立精舍而此蟻子亦在中生乃至今日九十一劫受一種身不得解脫生死長遠唯福爲要不可不種是時須達悲心憐傷經地已竟起立精舍爲佛作窟以妙栴檀用爲香泥別房住止千二百人凡百二十處別打撻椎施設已竟欲往請佛復自思惟上有國王應當令知若不啓白黨有瞋恨卽往白王我爲世尊已起精舍唯願大王遣使請佛時王聞已卽遣使者詣王舍城請佛及僧唯願世尊臨覆舍衛爾時世尊與諸四衆前後圍遶放大光明震動天地至舍衛國

所經客舍悉於中止道次度人無有限量漸漸來近  
舍衛城邊一切大集持諸供具迎待世尊世尊到國  
至廣博處放大光明徧照三千大千世界足指按地  
地皆震動城中妓樂不鼓自鳴盲視聾聽瘡語瘞伸  
瘡殘拘僻皆得具足一切人民男女大小覩斯瑞應  
歡喜踊躍來詣佛所十八億人都悉集聚爾時世尊  
隨病投藥爲說妙法宿緣所應各得道迹有得須陀  
洹斯陀含阿那含阿羅漢者有種辟支佛因緣者有  
發無上正真道意者各各歡喜奉行佛告阿難今此  
地須達所買林樹華果祇陀所有二人同心共立

精舍應當與跋太子祇陀樹給孤獨園名字流布傳  
示後世爾時阿難及四部衆聞佛所說頂戴奉行  
大光明始發無上心緣品第四十四

如是我聞一時佛在羅閱祇迦蘭陀竹園爾時阿難  
在林樹間靜坐思惟欵生此念如來正覺諸根具足  
功德慧明殊妙難量世尊先昔本何因緣發此大乘  
無上之心修習何事而得如是勝妙之利作是念已  
卽從禪起往詣佛所頭面作禮前白佛言如諸如來  
於諸世間人天之中最尊最妙功德慧明巍巍無量  
不審先昔以何因緣發此大乘無上之心佛告阿難

80 1 2 3 4 5 6 7 8 9

此

100

此

1 2 3 4 5 6 7 8 9

此

汝欲知者善思念之五品當爲汝具分別說阿難白佛  
諾當善聽佛告阿難過去久遠無量無邊不可思議  
阿僧祇劫此閻浮提有大國王名摩訶波羅婆修言  
明大光主五百小國爾時大王與諸羣臣俱出遊獵王

所乘象欲心熾盛擔王馳走奔逐特象漸逼林木突  
入樹間象師白王捉樹自立足得全濟王用其言俱  
捉持樹象去之後王心大怒苦責象師欲卽殺之由  
卿調象不合制度致使今者僅危吾身象師白王調  
之如法但今此象爲欲所惑欲心難調非臣咎也願  
見寬恕却後三日象必自還觀臣試之萬死不恨卽

便停置如期三日象還詣宮爾時象師燒七鐵丸令  
色正赤逼象吞之象不敢違吞盡卽死王意開解及  
諸羣臣歎未曾有復問之曰如此欲心誰能調者時  
有天神感悟象師令答王曰佛能調之王聞是語便  
發心言如此膠固難調伏法唯佛能除卽自誓願願  
求作佛精勤歷劫未曾休替至於今日果獲其報佛  
告阿難欲知爾時大國王者今我身是爾時衆會聞  
佛所說咸發無上正真道意歡喜踊躍不能自勝頂  
受奉行

勤那闍耶緣品第四十五

如是我聞一時佛在迦毗羅衛國尼拘盧陀僧伽藍爾時諸釋覩見世尊光明神變闡揚妙化甚奇甚特巍巍堂堂無能及者又復歎美僧行如等宿有何慶如來出世法鼓初振最先得聞甘露始降而便蒙澤永離垢穢心體玄要城營村邑羣黨相隨異口同音稱讚無量時諸比丘聞是語已往至佛所頭面禮足前白佛言今此國界人民之類咸共集聚異口同音讚詠世尊若干德行及與五人宿有何慶獨先蒙度佛告比丘非獨今日先度五人我於久遠亦濟此等以身爲船救彼沒溺全其生命各得安隱得至彼岸

吾今成佛先拔濟之時諸比丘卽白佛言不審世尊先昔之時云何拔濟令各安隱唯願世尊當爲說之佛告比丘若樂聞者當爲汝說皆曰唯然佛告比丘過去久遠此間浮提波羅柰國時彼國王名梵摩達爾時國中有大薩摩名勒那闍耶遊出於外到林樹間見有一人涕泣悲切以索繫樹入頭在眉欲自戮死便前問之汝何以爾人身難得命復危脆乘變無數恒恐自至種種曉喻教令捨索人報之曰我之薄福貧窮理極債負盈集甚多難計諸債主輩競見剝脫日夜催切憂心不釋天地雖寬無容身處今欲自

沒避離此苦仁雖諫及存不如死爾時薩薄卽許之曰卿但自釋所負多少悉代汝償作是語已彼人便休歡喜踊躍感戴無量隨從薩薄俱至市中宣令一切云欲償債時諸債主競共雲集迎取所負來者無限空竭其財財貨已盡猶不畢債妻子窮凍乞匄自活宗親國邑悉共訶嫌此是狂夫自破家業當于是時有衆賈人勸進薩薄欲共入海卽答之曰爲薩薄法當辦船具我今窮困無所復有何緣得從衆人報言我等衆人凡有五百開意出錢用辦船具聞是語已卽便許可衆人投合大獲金寶爾時薩薄以三千

兩金子兩辦船千兩辦糧千兩用俟船上所須餘故大有給活妻子便於海邊施作大船船有七重嚴辦已訖推著水中以七大索繫著岸邊鳴擊大鈴宣令一切誰欲入海得大妙寶奇珍異物用無盡者今可雲集共詣寶所復告之曰其誰不愛父母妻子閭浮提樂及身命者乃可往耳所以然者大海之中難險衆多迴波暴風大魚惡鬼如是種種不可具陳作是語已卽斷一索日日如是至第七日斷索都盡船卽馳去便於道中卒遇暴風破碎船舫衆人喚救無所歸依或有能得板檣浮囊以自度者或有墮水溺死

之者中有五人共白薩薄依汝來此今當沒死危險  
 垂至願見拔度薩薄答曰吾聞大海不宿死屍汝等  
 今者悉各捉我我爲汝故當自殺身以濟爾厄誓求  
 作佛後成佛時當以無上正法之船度汝生死大海  
 之苦作是語已以刀自刎命斷之後海神起風吹至  
 彼岸得度大海皆獲安隱佛告比丘欲知爾時勒那  
 閻耶者今我身是時五人者拘隣等是我於先世濟  
 彼人等生死之命今得成佛令其五人皆最初得無  
 漏正法遠離長流結使大海爾時諸比丘皆共讚歎  
 如來大悲深妙難量咸勤克勵聞佛所說歡喜奉行

### 迦毗梨百頭緣品第四十六

如是我聞一時佛在摩竭國竹園之中爾時世尊與  
 諸比丘向毗舍離到犁越河所是時河邊有五百牧  
 牛人五百捕魚人其捕魚者作三種網大小不同小  
 者二百人挽中者三百人挽大者五百人挽於時如  
 來去河不遠而坐止息及諸比丘亦皆共坐時捕魚  
 人網得一魚五百人挽不能使出復喚牧牛人衆合  
 有千人併力挽出得一大魚身有百頭若干種類驢  
 馬駱駝虎狼猪狗猴狐狸如斯之屬衆人甚怪競  
 集看之是時世尊告阿難曰彼有何事大眾皆集汝

往試看阿難受教卽往看視見一大魚身有百頭還  
白世尊如所見事世尊尋時共諸比丘往至魚所而  
問魚言汝是迦毗梨不答言實是鄭重三問汝是迦  
毗梨不答言實是復問教匠汝者今在何處答言墮  
阿鼻獄中爾時阿難及於大衆不知其緣白世尊曰  
今者何故喚百頭魚爲迦毗梨唯願垂愍而見告示  
佛告阿難諦聽諦聽當爲汝說昔迦葉佛時有婆羅  
門生一男兒字迦毗梨此言黃頭聰明博達於種類中多  
聞第一唯復不如諸沙門輩其父臨終慇懃約勑汝  
慎莫與迦葉沙門講論道理所以者何沙門智深汝

必不如父沒之後其母問曰汝本高明今頗更有勝  
汝者不答言沙門殊勝於我母復問言云何爲勝答  
言我有所疑往問沙門其所演說令人開解彼若問  
我我不能答以是之故自知不如母復告言何以不  
往學習其法答言欲學其法當作沙門我是白衣何  
緣得學母復告曰僞作沙門學習已達還來在家奉  
其母教而作比丘經少時間讀誦三藏綜練義理母  
問之曰今得勝未答言學問中勝不如坐禪何以知  
之我問彼人悉能分別彼人問我我不能知因是事  
故未與他等母復告曰自今已往若共談論儻不如

時便可罵厚迦毗梨言出家沙門無復過罪云何罵之答言但罵卿當得勝時迦毗梨不忍違母後日更論理若短屈即便罵言汝等愚騃無所識別劇於畜生知曉何法諸百獸頭皆用比之如是數數非一非二緣是果報今受魚身而有百頭阿難問佛何時當得脫此魚身佛告阿難此賢劫中千佛過去猶故不脫爾時阿難及於衆人聞佛所說悵然不樂悲傷交懷咸共同聲而作是言身口意行不可不慎時捕魚人及牧牛人一時俱共合掌向佛求索出家淨修梵行佛即可言善來比丘鬚髮自落法衣在體便成沙

門是特世尊爲說妙法種種苦切漏盡結解成阿羅漢復爲會衆廣說諸法分別四諦苦集滅道有得初果乃至四果有發大道意者其數甚多爾時四衆聞佛所說歡喜奉行

淨居天請洗浴緣品第四十七

如是我聞一時佛在舍衛國祇樹給孤獨園爾時首陀會天下闍浮提至世尊所請佛及僧洗浴供養世尊默然以爲許可卽設飲食并辦洗具溫室煖水調和適體酥油浣草皆悉備有施設已辦白世尊曰食具已訖唯聖知時於是世尊及諸比丘納受其供盡

80 1 2 3 4 5 6 7 8 9 10

1 2 3 4 5 6 7 8 9 10

共洗浴并享飲食其食甘美世所希有食竟澡漱各還本坐是時阿難長跪合掌白世尊曰此天往昔作何功德形體殊妙威相奇特光明顯赫如大寶山唯願世尊敷演其事佛告阿難諦聽善持吾當解說乃往過去毗婆尸佛時此天彼世爲貧家子恒行傭作以供身口聞毗婆尸佛說浴僧之德情中欣然思設供養便勤作務得少錢穀用設洗具并及飲食請佛衆僧而以盡奉由此福行壽終之後生首陀會天有此光相佛告阿難而此天者非但今日請佛及僧尸棄佛時亦來世間供養世尊及於衆僧乃至迦葉佛

時亦復如是佛告阿難此天非但承供七佛於當來世賢劫之中千佛興出亦當一一洗佛及僧猶如今日無有差別爾時世尊因授天記於未來世滿阿僧祇一百劫之中當得作佛號曰淨身十號具足所化衆生乃可限量爾時阿難及諸四衆聞佛所說歡喜無量咸作是言如來出世所利益大如是少施獲報彌多佛告阿難善哉善哉如汝所言因爲衆會廣說妙法其聞法者有得道迹往來不還逮應真者發大道意各各歡喜頂受奉行

## 賢愚因緣經卷第九

丹陽居士賀學禮施費刻此

丹陽居士賀學禮施費刻此

1

平陽居士賀掌禮施費刻此  
賢愚因緣經卷第九 計字八千七百二十六  
箇 該銀四兩五錢三分七厘  
平湖釋在照對金陵傅文貞書  
萬曆丁未秋八月徑山寂照庵識

賢愚因緣經卷第十  
中元魏沙門慧覺譯  
摩訶令奴緣品第四十八  
如是我聞一時佛在迦維羅衛國尼拘盧陀僧伽藍  
佛初還國於時諸釋觀佛威儀相好殊異身體金色  
三十二相視之無狀各共羣聚街陌市里異口同音  
歎說如來於此衆中無有儔類實可敬哉時諸比丘  
聞是論已並共白佛說其諸人歎詠之詞於時世尊  
告諸比丘汝等當知吾乃往昔於此衆中最尊最妙  
不但今日時諸比丘各共白佛不審世尊過去世時

於此衆中最尊最妙其事云何爾時世尊告諸比丘  
諦聽諦聽善著心中吾當爲汝具足解釋過去世事  
對曰雖然願樂欲聞佛便爲說過去無量不可思議  
阿僧祇劫此間浮提有大國王名曰令奴其王統領  
八萬四千諸小國王一萬大臣五百太子夫人子女  
合有二萬最大夫人字提婆跋提最後懷妊生一太  
子其兒端正身紫金色其髮紺青兩手掌中千輻輪  
相其左足底有馬形相其右足底有白象相其兒福  
德人中奇尊卽依父母而爲立字提婆令奴乳哺長  
大令奴大王卒遇時病其命將終諸小國王羣臣太

子咸來問病因問大王假其終沒諸王太子誰應紹  
嗣時王報曰若我諸子有能具足十功德者乃立爲  
王何等十德一者身紫金色其髮紺青二者兩手掌  
中有金輪相具足不缺三者其右足底有白象相四  
者其左足下有馬形相五者著王衣服與身相可不  
大不小六者坐王御座威德巍巍其坐安隱七者諸  
王羣臣歡喜敬禮稱善無量入於後宮夫人子女踊  
躍歡喜作禮恭敬八者若將至於天祠泥天木像悉  
爲作禮九者福德威力能雨七寶稱給一切十者其  
母是誰提婆跋提夫人所生若有具足是十功德斯

乃立之用作大王教勅已竟無常對至遂便命終諸王臣民五百子中從其大者次以十事觀相其身此諸太子身無金色髮無紺青手掌無輪足底無有象馬之相著王者服不相應當坐于御座其木師子驚張起立欲搏噉之諸王臣民悉不敬禮將至宮內夫人媛女悉不歡喜無禮敬者設入天祠自禮天像諸餘泥木天像悉不作禮語使雨寶亦復不能又復不是提婆跋提夫人所生乃至五百諸大太子於十事中乃無一事最下小子身紫金色其髮紺青看其兩手輪相具足覩其脚底象形馬相炳然如畫著王法

服與身相可坐於御座福德巍巍諸王臣民無不敬禮入於後宮夫人媛女敬奉作禮將至天祠泥木天像悉皆爲禮教使雨寶始語卽雨問是誰生提婆跋提夫人所生十事具足諸王臣民卽拜爲王至十五日日初出時有金輪寶從東方來輪有千輻縱廣一由旬王卽下座右膝著地跪而言曰若我福德應爲王者輪當稱我卽如其言來在殿前住虛空中白象寶者從香山來毛尾貫珠若王乘上象皆能飛從朝至午徧四天下若以足行足所觸地卽成金沙紺馬寶者身紺青色其馬毛尾皆悉珠色皆雨七寶若王

80 1 2 3 4 5 6 7 8 9

90

1

三

80 1 2 3 4 5 6 7 8 9

100

1

乘上一食之頃遊四天事不疲不勞神珠寶者自然而至其珠光明晝夜恒照百二十里內復能雨於七寶稱給一切玉女寶者自然而至端正殊妙稱適王意典藏臣者王須七寶隨意給足終無乏盡其典兵臣王若欲須四種兵時顧視之頃諸兵悉集行陣嚴整威力非凡七寶既具坐自思惟吾享斯位皆由前身宿種福業乃致之耳今當紹繼使不斷絕卽以香湯洗浴其身著新淨衣手執香爐向于東方跪而言曰東方快士來受我請卽時便有二萬辟支佛來至玉宮南西北方悉皆請之時有六萬辟支佛來受王

請王與諸臣四事供養其八萬四千諸小國王離家來久卽啓大王欲辭還國王卽聽之因啓王曰此中快士其數甚衆願王垂愍減省少許與臣供養願使將來共享斯福於時大王卽以四方辟支佛與諸小王隨時供養經八萬四千歲諸王臣民命終之後皆得生天佛告諸比丘欲知爾時令奴王者今現我父白淨王是爾時提婆跋提夫人者今現我母摩訶摩耶是爾時提婆令奴王者今我身是爾時五百太子者今此五百釋是我乃爾時於諸人中最爲尊妙吾今成佛衆相具足於此衆中最爲奇妙時諸大會聞

80

1

2

3

4

5

6

7

8

9

10

11

12

13

14

15

16

17

18

19

佛所說有得須陀洹者斯陀含阿那含阿羅漢者有種辟支佛因緣者有發菩薩心成不退者衆坐歡喜頂戴奉行

善求惡求緣品第四十九

如是我聞一時佛在舍衛國祇樹給孤獨園爾時提婆達多雖復出家利養蔽心作三逆罪推山壓佛傷佛脚指復縱放黑象欲令害佛別僧兩部殺漏盡比丘尼以故殺生疑畏受後報時有六師卽往問之六師便爲說諸邪見言爲惡無罪爲善無福信敬心生憇斷善根是時阿難析體愛重悅恨情深悲哽懊惱

白世尊言調達患癡造不善業壞破善根辱釋種子爾時世尊告阿難言提婆達多非但今世爲利養故斷破善根過去世時亦貪利養喪身失命阿難白佛言世尊提婆達多過去世時貪利喪身其事云何願樂欲聞佛告阿難善聽當說往昔無量不可思議阿僧祇劫此閻浮提有國名波羅柰時有薩薄名摩訶夜移其婦懷妊自然仁善意性柔和月滿生男形體端正父母愛念施設美饍延請親戚并諸相師共相娛樂抱兒示衆爲其立字相師問言此兒受胎已來有何瑞應其父答言受胎已來其婦自然慈心和善

相師卽爲立字名爲善求乳哺長大好積諸德慈愍衆生次後懷妊自然弊惡期滿生男形體醜陋卽請相師爲其立字相師問言此兒懷妊有何感應答言懷兒已來受性弊惡於時相師卽爲立字名曰惡求乳哺長大好爲惡事恒生貪心懷嫉妬意年各長大欲行共賈入海求索寶物各有五百侍從前後而發途路懸遠中道乏糧經於七日去死不遠是時善求及諸賈人咸共誠心禱諸神祇欲濟飢儉於空澤中遙見一樹枝葉鬱茂便卽趣之有一泉水善求及衆悉共誠心求哀救護誠感神應現身語之研去一枝

所須當出諸人歡喜便所一枝美飲流出研第二枝種種食出百味具足咸共承接各得飽滿研第三枝出諸妙衣種種備具研第四枝種種寶物悉皆具足莊嚴悉備所須盡辦惡求後到衆人如前盡得充足便自念言今此樹枝能出如是種種好物況復其根今當伐之足得極妙佳好之物思惟心定令人伐之是時善求聞如是語懷憤懊惱語惡求言我等飢乏命在旦夕蒙此樹恩得濟餘命云何懷此弊惡之心而欲伐之爾時惡求不用其言卽掘其根善求感佩不忍見之領衆歸家伐樹已竟有五百羅刹取此惡

求及衆賈人悉皆噉之財物伴侶一切喪失佛告阿難爾時善求者今我身是爾時父者今現我父淨飯王是爾時母者今現我母摩訶摩耶是也時惡求者今提婆達多是阿難提婆達多非但今日作不善事貪利故世世常造我於往昔常與相值恒教善法而不用之反更以我爲怨爾時阿難及四部衆聞佛所說悲喜交集咸自勸勵頂戴奉行

### 善事太子入海緣品第五十

如是我聞一時佛在羅閱祇者闍崛山中與大比丘僧圍遼說法爾時賢者阿難見提婆達多於如來所

常懷嫉妒驅飲醉象推山鎮佛種種方便欲得危害然佛慈心常有矜愍於羅睺羅及提婆達多視之一等無有差別賢者阿難覩其如是常懷惋悵思惟在意從座而起偏袒右肩長跪合掌歎說是事佛告阿難提婆達多不但今日興惡於我宿世之時亦傷害我然我於彼常慈念之賢者阿難卽白佛言不審世尊提婆達多亦爲傷害爾時慈愍其事云何願具說示佛告阿難過去久遠無量無數不可思議阿僧祇劫此間浮提有一國王名曰勒那跋彌此言領五百小國王有五百夫人女皆無有子王便禱祠諸天

日月山海樹神經年歷紀不獲子息王大愁憂而自念言我今無子旦夕崩亡國無紹繼天下必亂所以者何五百諸臣不相賓伏便當力諍強弱相陵枉殺無辜亡國喪民莫不由此念是事已益增憤惱時有天神知王至意於王夢中而語王言城外林中有二仙士其第一仙身有金色福德聰辯不可逮及汝苟須子可往求請必當迴意來生王家王尋驚悟差有喜色卽勑駕乘單將數人徧往推覓便得見之卽向求哀種種自說國無繼嗣憂深慮重貪屈大仙來生我家紹繼國嗣去我憂患若不見恥唯垂降顧爾時

仙人見王慇懃不忍拒逆卽便可之第二仙人復語王言我亦當往生於王家王大歡喜便辭還宮經歷數時金色仙人卽取命終大王夫人名曰蘇摩卽覺有身聰明女人能得此智知所懷妊分別男女便自說言我所懷妊必當是男王及宮內聞此語已欣悅無量王勅宮內夫人婦女盡共承給稱悅其意牀褥飲食極令細軟將護進止不臨危險十月已滿其大夫人便生男兒端正絕異身紫金色其髮紺青人相具足王及內外觀之無狀因召相師令占相之相師尋詣上下觀相歡喜踊躍而白王言此兒相好人中

80 1 2 3 4 5 6 7 8 9

1 2 3 4 5 6 7 8 9

1 2 3 4 5 6 7 8 9

難有聰明福德不可逮及王聞遂喜復告相師可爲立字相師問王今此太子受胎已來有何變異王卽答言此太子母素來妬惡樂人之過妄舉姦非見他人善心不爲喜懷妊已來志性改異爲人慈仁矜愚愛智好修施惠等意護養相師聞此讚言善哉此是見志寄情於母便爲立字名迦良那伽梨此言其事其第二夫人名曰弗巴第二仙人亦復命終生於第二夫人腹中日月足滿便生男兒形體狀貌無他殊異復召相師次令相師而瞻相之相師披觀而語之言此太子者是常人耳福德智能爲足自住王復勅之爲

其立字相師復言有何異事王語相師此太子母素性忠良爲人慈順樂宣人善懷妊已來反更樂惡嫉妬賢能見善不喜相師復言此亦見志寄之於母故使然耳因卽立字爲波婆伽梨此言其事王爾時注心愛念迦良那伽梨不失其意卽勅爲起三特之殿冬時居溫殿春秋居中殿夏時居涼殿安置妓直而娛樂之太子漸大聰辯殊異學諸世典十八部經誦持通利并善其義後辭出遊王卽聽之勅治道陌除去不淨乘大白象金銀校飾千乘萬騎導從前後街道陌中一切人民夾道兩邊諸樓閣上觀者無數皆言

太子覩似梵天威相姿貌人中希有爾時太子見諸乞兒身體羸瘦衣被弊壞左提破器右持折杖卑言求哀從人乞乞太子問曰何以乃爾羣臣答言如此人輩或無父母孤窮單獨無所依仰瘡疾狂病不能作役無一錢儲身口所切是使爾耳太子慈愍心深增悼轉復前行見諸屠兒殺害畜生稍割稱賣太子問言何以作此尋各答言我不必樂祖父已來以此爲業若捨此事無以自濟太子聞此長歎而去轉前到田見諸耕者墾地蟲出蝦蟆拾吞復見有蛇吞食蝦蟆孔雀飛來啄食其蛇太子問人此作何等耕者

答言此是我業於中下種後當得穀以自供食并輸王家太子歎曰人由飲食殺害衆生役身役力辛苦乃爾轉復前行見諸獵師趣向羣鳥挽弓欲射復見安綱張施在地見諸禽獸墮在其中驚張鳴吼不能得脫太子問言皆作何等咸皆答言捕諸禽獸以自供濟太子聞此深歎捨去到河池邊見捕魚師張網捕魚狼藉在地跳踉伸縮死者無數太子復問皆各答言我仰此魚用供衣食太子長歎哀羣生爲衣食故乃當如是殺害衆生供俟身口殃罪日資後報如何便迴還宮憂念不樂往白父王願賜一願王答

之曰恣汝所欲不相違逆太子白王出行遊觀覩彼羣品爲衣食故欺誑殺害積罪日增意甚憇懃欲得供濟願王聽我用於王藏自恣希施克民所乏王於太子倍加愛念聞其所語不能違意卽便可之於是太子卽時宣下告諸人民迦良伽梨太子布施窮困乏短之者一切施給皆悉來取若有欲須金銀寶物衣服飲食及餘所須當施與之卽開王藏出諸寶物著諸城門及置市中隨人所須一切悉給爾時諸國沙門婆羅門貧窮孤老癃殘疾病強弱相扶次第而至須衣與衣須食與食金銀寶物恣意而與爾時人

氏展轉相語徧闇浮提皆悉來集用王寶藏三分向二時典藏臣入白王言大王典領五百小國諸國使命當有往反事須寶物還相報遺太子布施用王內藏三分之物向用其二王可思之勿令後悔王聞是語而告臣言我此太子意好布施其心猛盛不可迴轉若當禁遮儻違其意令其憂惱當云何耶分恣其意莫得違失如是數時太子布施所殘藏物三分用二臣復白王前所殘物日日布施三分之中已更用二餘殘少許當俟信遺不可盡用願王熟思後莫見咎王便思惟而告臣曰吾愛此子特復倍餘不忍顯

露遠逆其意若來索寶小避行來若其急索且復與之乍得乍否可延日月爾時藏臣得王教已太子後日來索寶時其臣託緣餘處行來或時索得或時不得不能一一稱其所須太子覺之而自念言今此藏臣有何力能敢違失我不相承用將是王意故使爾耳又人子禮不應竭用父母庫藏令其盡也今此藏中所殘無幾我當云何得於財寶給施一切令無有盡作是念已卽問諸人今此世間作何事業可得多財稱意足用有一人言不避劇難遠出販賣可得多有一人言墾治田畝不避寒暑廣種五穀可得多

財有一人言多養六畜隨時將護時節蕃息可得多財或一人言唯不顧命能入大海至龍王宮求如意珠斯事成辦最得多財於時太子聞衆人語而自念言行賈種田畜養六畜且非我宜得利無幾唯入大海詣龍王宮此入我意當勤求是事作是念已往白父王我欲入海求索珍寶給施衆生用之無盡唯願父母當見聽許王及夫人聞太子言甚懷憂惄問太子曰汝有何意而欲入海苟欲布施成汝本志我家所有藏內餘殘盡當與汝以用布施何爲自棄云欲入海又聞海中多諸劇難黑風羅刹水浪迴波摩竭

大魚水色之山如斯衆難安全者少百伴共往時有一還汝今何急沒身危險我及汝母無不極憂諸王臣民皆懷惄惄之懼念捨此意勿更紛紜於是太子聞王此語心存大計志期拔濟王雖留遮意不傾動規盡身命成辦其事布身于地腹拍王前因白王言唯願垂哀遂子本心若必拒逆不見聽許伏身此地終不起也王及夫人內外一切見太子意不可迴轉自誓畢死伏身于地皆共解喻曉謝令起其言如初執志不變從一日至二日乃至六日王及夫人自共議言太子不食已經六日到明七日命必不全此見

前後意所欲作要必成辦不可迴轉若令人入海猶有還理今違其意交斷人望就當聽之故憂在後王與夫人相可已訖俱共來前各捉一手涕淚交流因語之言聽汝入海可起還食於時太子聞王語已歡喜而起曉諭父母我雖入海不久當還唯願莫大憂念於我爲辦種種餚飲食已訖出外廣行宣令迦良那伽梨今欲入海誰欲往者當共俱進爾時國中有一五百賈客咸皆來集悉言欲去是時國中有盲導師自前已曾數反入海太子聞之卽往到邊向其慇懃嘉言求曉汝當與我共入大海示我行來利害去就

導師答言我旣年老又盲無見雖欲自力私情甚難  
王愛太子隆倍異常須臾離目有懷悒遲今聞與我  
共入大海儻復見拒咎我不少於時太子聞是語已  
卽便還宮自白父王今此國中有盲導師前已數反  
曾到大海願王勑曉令共我去王聞是語自往其所  
語導師言我此太子志存入海種種諫語意志不迴  
事不得已今就聽去念其年少未狀辛苦聞汝曾行  
知海去就望汝迴意恐勞共往爾時導師聞王是語  
卽白王言恨我年老盲無所見大王所勑豈敢有違  
王得是語卽自還宮于時太子卽共導師論定發日

還到王所王問左右誰敬愛我可與太子共往採寶  
波伽梨卽白王言願與兄俱共涉大海王聞此語而  
自念言令弟共往險厄之中儻能濟要勝於他人作  
是念已即可聽去爾時太子出三千兩金以千兩辦  
糧千兩辦船寢以千兩供諸所須嚴辦已訖於是欲  
發王及夫人諸王臣民啼哭送之別於路次於是太  
子與諸同伴進道而去到於海邊牢治其船令有七  
重候風時節推著水中以七大索繫於海邊搖鈴唱  
令語衆人言汝等皆聽海中衆難水浪迴波惡龍羅  
刹黑風迴復海色之山摩竭大魚如是餘難其數猶

多前後入海吉還者少若狐疑者於此可還誰能堅意分捨身命不顧父母不戀妻子當共入海至於寶所若得珍寶安隱還歸子孫七世用不可盡作是念已便斷一索日日如是至於七日唱令已訖斷第七索望風舉帆船疾如箭徑與諸人到彼寶渚太子聰明通達世典識寶色相悉知其價示語衆人諸寶好醜勅語衆賈令隨意取重告衆賈令多少得中多取船重有沉沒之憂少取行勞不補其苦勅誠已訖獨與導師別乘小船與衆人別轉復前進導師問言此前應有白色之山汝爲見不太子言見導師語言此

是銀山轉復前行導師復問當有緋色之山汝見未耶太子答言我已見之導師語言是紺瑠璃轉更前進復問太子此中應有黃色之山汝爲見未太子言見導師語之此是金山到金山下坐金沙上導師言曰我今羸劣命必不濟卽示方面進止道路汝從是去前當有城極妙七寶雜廁汝到城門城門若閉其城門邊有金剛杵汝便取杵以撞其門城中當有五百天女各齋寶珠來用奉汝更有一女最特尊勝所持寶珠而有紺色名旃陀摩尼此如意珠得便堅持勿令失脫其餘與者亦得取之攝錄諸根勿復與語

我今轉極餘命少少若命終後念識我恩對我發哀  
埋此沙中導師語竟氣絕命終對之悲慟爲之葬埋  
隨其所教進前而去到七寶城城門堅閉見金剛杵  
在其門邊如語取杵以撞其門城門便開五百天女  
各持寶珠來奉太子最前一女手所持珠如語紺色  
隨次第攝取裹在衣角便旋還來前太子別後波婆  
伽梨復語衆人行來不易但當多取衆人貪寶取之  
過度太子還到其船已滿放船還來船便沉沒諸賈  
人輩乍沉乍浮太子已有如意珠故身不沒溺波婆  
迦梨遙喚太子當見救濟勿便捐棄太子聞語卽牽

其浮力勵相挽便得出海出海之後弟語兄言我曹  
兄弟辭父母來入於大海望不空歸際遇不諧喪失  
財寶單身空到甚可恥也迦良那伽梨天性忠直卽  
語弟言我故得寶弟語兄言當用見示卽解衣裹以  
珠示之弟得見珠因而懷情念我父王恩慈不普偏  
愛我兄我不在意今我二人俱來入海兄得異寶我  
獨空歸從是已後當遂賤遇我我當云何因其臥寐  
徐殺其兄取其珠寶歸語父王言其兄沒海於是乃  
當異愛念我作是念已密自懷計語其兄言人村漸  
近我曹兄弟不應俱眠宜更坐守護持寶珠兄節然

之常共更守波婆伽梨次應休息臥地經時極過常度然後乃起兄復次臥由坐久故睡寐極著波婆伽梨起入林中林中有樹其刺極利卽取兩枚各長尺五持來兄邊兄眠甚重一手捉一當其眼宿刺令沒刺收寶而去太子苦痛高聲急喚波婆伽梨波婆伽梨此中有賊喚經數反無有應者爾時樹神語太子波婆伽梨是汝之賊刺汝眼竟持汝珠去於時太子宛轉辛苦匍匐而行漸小前進到梨師跋陀國至於澤宕值五百牛來到其邊有一牛王見於太子憐散慷慨出舌舐之餘牛悉集愕住共視時牧牛人來前

試看乃覩太子臥在干地見其眼中有是長刺觀其形相又知非凡卽爲拔刺將至住處常以野乳著其瘡中飲食供給隨時瞻養復經數時眼瘡漸瘥主人承事未曾懈廢爾時太子問牧牛人汝居此中有何基業牧牛人答我在此中無有基業唯仰乳酪賣用自濟太子自念我遭困厄勞煩主人恒供養我今者瘡瘻小能行來當更方宜求易處所念是事已因語主人爾所時節共相勞煩感念主人恩難酬報我欲前行到於城中展轉行乞以自供活時牧牛舍主聞太子言懼其舍內妻子奴婢有餘歟辭聞太子耳若

其不爾何緣乃辭作是念已先問舍內汝曹有何不稱之事而令貴客辭欲索去舍內皆言我曹於此如兄如弟不知何緣欲相捨去於時舍主語太子言我相承待未有不稱不可捨我轉行餘乞於時太子聞舍主語見其慇懃恒護其意且小停住復經數時便語主人汝供待我躋時無乏家內一切接我隆厚但我意中自欲轉行到前城中望遣一人將我共往時牧牛人見其慇懃恐違其意令其心愁躬自將護共至城中已到彼城共別當還太子語言汝哀我者買索一琴與我自娛時牧牛人尋買琴與共相辭謝於

是別去爾時太子素多技能歌頌文辭極善巧妙卽於陌宿激聲歌頌彈琴以和音甚清雅城中人民聞其音者皆樂聽觀無有厭足各持飲食競來與之時城中有五百乞兒皆來依附賴其飽食梨師跋王有一園監爲王監守果柰之園柰有熟者鶗鴂來食手力不周不能驚逐於時園監擔柰與王其中好柰鶗鴂啄壞王見瞋恚欲加刑罰園監惶怖白王自陳家之力故使爾耳唯見寬恕原恕刑罰當索守人更不令爾王便怒置不問其罪園監得脫行求索人見迦良那伽梨句於道邊觀其形相似是忠人卽語之

80 1 2 3 4 5 6 7 8 9

1 2 3 4 5 6 7 8 9

1 2 3 4 5 6 7 8 9

曰汝能爲我看守園不汝若能者當供所乏太子答  
 言我眼無見云何看守園監語言汝苟欲看雖復無  
 眼當作方便多作細繩繫諸樹端以諸鈴物連繫相  
 著展轉相牽汝捉一頭若聞有聲汝便頓繩鸚鵡驚  
 悅無緣得住太子聞語而答之言若有此事我能爲  
 之其相可竟卽往爲守時波婆迦梨到父王國王怪  
 獨來卽問消息波婆迦梨而語王言我曹不偶船重  
 沉沒迦良那伽梨并諸買人合諸珍寶盡沒大海我  
 力勵浮趣得全濟王及夫人聞是語已絕悶良久無  
 所覺識以水灑面因乃還蘇宮閣內外諸王臣民聞

此事者莫不悲悼王及夫人語波婆迦梨太子沒海  
 汝何以來何不并就死大海中合土臣民無不痛惜  
 朝夕哭戀如喪父母太子在宮常愛一鴈王告其鴈  
 太子養汝今沒大海淹沒不還何不往看知其所在  
 因作書音以繫鴈頸鴈卽高翔廣行求覓遊彼園上  
 識其歌聲卽下試看得見太子鳴聲悲喜不能自勝  
 太子聞識卽解取書眼無所見不能看讀因求筆紙  
 作書與王說波婆迦梨刺眼委曲所更歷處辛酸諸  
 事繫於鴈頸鴈便飛去梨師跋王時有一女端正殊  
 妙世間希有王甚愛重不違其意時女辭王出遊園

觀王便聽去女至園中見於太子迦良那伽梨頭亂面垢目無所見著弊壞衣坐林樹間其女觀察覩其色狀心情屬向不離其側便坐其邊與共談語食時已到王遣人喚女還遣人白於王曰願送食來欲就此食卽送食來女語太子我欲共汝一處坐食太子答言我是乞匄之人汝是玉女云何共食若王聞者罪我不少其女慇懃語太子言若汝不肯我便不食如是數反逼迫不已而便共食言遂欵篤意漸附近目無去離日轉欲慕王遣人喚女女還遣人往白王曰我願爲此守園人婦不用其餘國王太子今我專

心慇懃如是唯願父王勿遣我意使到王所具道其事王聞是已不能違情因自言曰此事災異是女不肖乃至若是寶鐘大王第一太子迦良那伽梨來求索之今此太子入海未還乃欲爲是乞兒作婦辱人名字甚爲不少我當覆頭藏著何處作是語已復遣人喚女言如初執志不移時王愛念不能違意就并將來著於宮中便令交會成爲夫婦復經數日婦恒晝去寢乃來還夫怪問之汝言與我共爲夫婦晨去暮還心不在此將爲他志故使爾耶婦因自誓我今一心共相尊奉無有他意大如毛髮若當實爾至誠

不虛令汝一日平完如故言誓已訖一日尋復如是  
 已後復問太子汝之父母爲在何國太子語婦汝聞  
 大王勒那跋彌名字不耶答言聞之是我父也彼王  
 太子迦良那伽梨汝復聞不答言聞之我身是也婦  
 卽驚問汝復何爲辛苦如是太子因爲說其本末婦  
 聞是語復懷歎息語太子言波婆伽梨懷害於汝自  
 古至今未有此處汝若得彼當云何治答言波婆伽  
 梨雖害於我我於其邊永無瞋恨婦復語言此事難  
 信相困如是柰何不瞋迦良那伽梨因自誓言若我  
 於彼波婆伽梨無有微恨大如毛髮我言至誠不虛

欺者當令一目復得平復自誓已訖眼悉明淨婦見  
 其夫兩目完淨端正威相未曾所覩喜不自勝往白  
 其父寶鎧太子迦良那伽梨父王識不王答言識女  
 卽言曰今欲見不王言今在何處女言我夫則是其  
 人王笑之曰此女癡狂志亂失性迦良那伽梨大海  
 未還見盲乞兒名之爲是女復白言願王往看王尋  
 往視審是太子衣毛悚然愧懼交懷腹拍其前向鐵  
 悔言實不相知願恕其過密將太子還著界上便唱  
 露言大王太子迦良那伽梨從大海還施設辦具嚴  
 駕象馬躬與羣臣自往迎之還來到國廣作賓衆莊

校其女方云始欲以女爲配爾時鴈還擔書到國大王見鴈披解看讀始得消息知太子存具其所更辛酸諸事王及夫人乍悲乍喜宮閣內外靡不悲悼懊惱瞋責取波婆伽梨枷鎖其身幽閉在獄勅令告下梨師跋王太子辛苦在於汝國云何默住不來表示書到其時象馬侍送事若有違吾當自往使便齋書徑到其國梨師跋王奉受披讀於是太子語梨師跋王牧牛之人於我有恩我今思念欲得見之可遣使往爲我喚之王尋召來太子語王我眼被刺正仰此人供給將養如我父母王若見念當爲我報王大歡

喜卽時賜遺名衣上服象馬車乘園田舍宅金銀寶物奴婢僕使并所典牛盡持與之其人歡喜非其所望使得安樂終身富貴卽還報使因表事情太子在此實所不知辛酸諸事伏想委曲太子今者已還得眼卽娉鄙女爲太子妻比嚴辨具臣自衛送尋勅嚴具五百白象金銀校飾極令殊妙選五百人奉侍太子復令擇取五百侍女極最端正才能巧妙種種寶物而莊嚴之五百乘車寶物莊校亦令極妙以送其女梨師跋王自與羣臣數百千乘亦共侍送妓樂歌頌閏遼前後稱慶無量進道還國爾時其使到大王

所披讀書表其增喜踊告下諸王悉皆來集卽嚴象  
馬羣臣百官夫人婦女導從前後躬迎太子到於界  
宿爾時太子遙見父王下車步進頭面禮拜問訊父  
母父母亦下更共抱特別久念想與汝相見一悲一  
喜諸王臣民見其如是欣感之情不可具說談語粗  
訖卽還駕乘椎鍾鳴鼓作衆妓樂歡喜稱善導從趣  
城到城門外太子白王波婆伽梨今何所在王答之  
言如斯惡人天下不覆吾不忍見先來幽閉在於獄  
中太子向王今當還放王答之言其罪深重未及檢

城王卽勅放語令來出既得脫出來見太子太子抱持慰撫其意然後爾乃入城至宮爾時父母諸王臣民男女大小見於太子視於怨家如視赤子波婆伽梨雖刺其眼無有微恨大如毛髮敬愛慈惻倍加於前一切大衆皆共歎美甚爲奇特天上人中實無有比太子到宮與波婆伽梨親欵之情慈愛如舊徐問其珠今在何處波婆伽梨答太子言來時藏著道邊土中勅還往取求覓不得太子共往到便見之收拾珠寶還共歸宮以五百寶珠遺與諸王各令取一殘如意珠而自留之手捉其珠便從求願若實當是如

意珠者令我父母所坐之處有七寶座頂上當有七寶大蓋其言已訖如語而成復捉其珠而從求願令我父母宮內諸藏及諸王臣所有諸藏前所用施悉令還滿卽時捉珠四向歷訖一切諸藏而皆還滿復勅諸臣告下諸國迦良耶伽梨太子却後七日當雨七寶卽時告下悉皆聞知於時太子香湯洗浴豎立大幢以珠著頭著新淨衣手執香爐向四方禮口自說言若其實是如意珠者便當普雨一切所須求願已訖四方雲霧卽有風來吹除糞穢及餘不淨悉白除去次復雨水用淹塵土次復雨於百味飲食種種

美末次雨五穀次雨衣服次雨七寶積滿天下爾時人民稱慶無量視諸珍寶猶如瓦石於時太子廣布宣令汝等已得一切所須供身之事無所乏少若能感謝如是之恩當攝身口意修十善道爾時一切閻浮提內感念太子無極之施又聞其令勉勵其心奉行十善不犯衆惡命終之後皆得生天佛告阿難欲知爾時迦良耶伽梨太子者今我身是爾時我父勒那跋彌今現我父淨飯王是爾時母者今現我母摩訶摩耶是時梨師跋王摩訶迦葉是爾時妻者今瞿夷是爾時波婆伽梨者今提婆達多是閻浮提人蒙

我恩者我初得道八萬諸天及我弟子得受記者如  
此等是阿難我於爾時爲彼所害辛苦極理猶以慈  
心而矜愛之況我今日得成佛道煩惱都除慈悲廣  
布被彼少害豈不愍佛說是已時諸會者聞佛所  
說感念世尊爲於羣生經涉劇苦而不退廢歎未曾  
有悲喜交懷起心廣志思惟妙法有得須陀洹斯陀  
含阿那含阿羅漢者有種辟支佛善根者有發無上  
正真道意者咸共敬戴歡喜奉行

### 賢愚因緣經卷第十

#### 校訛

### 十三紙二行

作反

#### 音釋

哺

蒲故切口銅也

齒

倪結切齒同疇也

惋

烏貫切驚歎也

跢

呂張切跳躍也

跔

呂張切跳躍也

惕

拘之若切痛也

惕

他歷切憂也

丹陽居士賀學禮施貲刻此

賢愚因緣經卷第十 計字九千五百五十箇

該銀四兩九錢七分

魏唐釋大困對金陵傳文貞書當塗劉愁敷刻

萬曆丁未秋八月徑山寂照庵識

惠山大園主金刃書文貞蓄蓄堂深然披

卷之三

80 1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9 100

二  
七

西行日記